

ዳኣኔኤሌ ማፃኣፖ ዓይያ ካሮ

ጾኦሲ ማሊያ ከኤዜ ዳኣኔኤሌ ማፃኣፖ ፃኣፒንቴሢ ዓይሁዶ ዓሳ ሜሌ ዴሮ ካኣቶ ዴማ ዋርቃ ዋዴና ዴኤፒ ዳውሲሢና ሄርቁ ዋይሥሢ ዓይያ ሄሌም ሜታዲሢዳ ዓኣንቴኬ። ሃኖ ማፃኣፖ ፃኣፔ ዓሢ ማዲንቴ ሃይሶ ከኤዚሢና ገንሣ ሃሣ ጾኦሲ ዒዛም ፔጋሲ ዳዌ ባኮ ከኤዚሢና ዬኖ ዋዶና ዓኣ ዴሮ ዶዲሻኔ፤ ዓይያ ሄርቁ ዋይሣ ዓሢ ሺኢሺ ዴራ ፔኮም ካፒሲ ናንጋንዳ ናንገ ጾኦሲ ዒንጋንዳሢያ ሃጋኣ ዋዛ ማሃ ዒ ከኤዛኔ። ማፃኣፔሎኮ ላምዖ ዴኤፒ ዴኤፒ ቤሲ ዓኣያኬ።

1. ዳኣኔኤሌንታ ዒዛና ዋላ ዳውሲንቴ ዳካ ዓሲሰኬንሢንታ ጾኦሲ ዓይያ ዶዲ ጉሙርቁሢሮ፤ ሃሣ ዒዛም ዓይያ ዓይሢንቴሢሮ ዓይያኮ ሞርካ ቦርሲንቴ ሃይሴ ከኤዛይ ዓኣኔ፤ ዬይ ባካ ማዲንቴሢ ባብሎኔና ፓርሴና ካኣታ ካኣታዲ ዋይሣ ዋዶናኬ።
2. ዳኣኔኤሌም ጾኦሲ ፔጋሲ ዳዌ ዶማ ዶማ ባኮ፤ ዬይ ዳዊንቴ ባካ ባብሎኔ ካኣቱማፓ ዓርቃዖ ዶማ ዶማ ካኣታ ካኣታዲ ካኣታዲ ገንሣ ዶዓንዳሢና ሜሌ ዴርታዖ ዋይሣ ዓሳ ባይቁም ጾኦሲ ዴራ ፔኤኮ ቤርታኣ ቤዞ ገንሣ ማዓንዳሢ ዛላ ዳዋናያኬ።

ማፃኣፔላ ዶማ ዶማ ዓርቁ ባኮ

- ዳኣኔኤሌና ዒዛኮ ሃይሣ ላጎንሢ (1:1-21)
- ካኣቲ ናብካዳናጾሬኮ ዓውቶ (2:1-49)
- ሲዲራቁ፣ ሚሳቁንታ ዓብዲናኣጎንታ ጾኦሲ ዓኤታ ታማፓ ዓውሴሢ (3:1-30)
- ናብካዳናጾሬ ላጎካይ ለዒ ካኣቱማፓ ከዲ ዴዒሢ (4:1-37)
- ካኣቲ ቢልፃሶኦሬና ኮጩይዳ ፃኣፒንቴ ጴዴ ባኣዚና ዛላ (5:1-31)
- ጾኦሲ ዳኣኔኤሌ ዘባፓ ዓውሴሢ (6:1-28)
- ዳኣኔኤሌም ጾኦሲ ፔጋሲ ዳዌ ያይዶ ቦዖ ኮኣኪንሢ (7:1-28)
- ዳኣኔኤሌም ጾኦሲ ፔጋሲ ዳዌ ዓዴ ማራይና ኮላይ ኮኣኪንሢ (8:1-27)
- ዳኣኔኤሌ ዴሮም ሺኢቁሢ (9:1-27)

ዳኣኔኤሌ ጃግርሴ ዋሮ ዓጫ ዴንቁ ያኦሲ ኪኢታንቻህ (10:1—11:45)
ጋፒንዖ ዋዶ ዛላ (12:1-13)

ዳኣኔኤሌና ላጎንህና ናብካዳናዖኦሬኮ ካኣቱሞ ማኣርይዳ

1 ዒዮዓቁሜ ዪሁዳይዳ ካኣታዳንቲ ሃይህሳ ሌዖና ባብሎኔ ካኣቲ ናብካዳናዖኦሬ ያላኒ ሙኪ ዬሩሳላሜ ማንጌኔ።

2 ናንገናናንጋ ጎዳ ዪሁዳ ካኣቲ ዒዮዓቁሜንታ ጌኤኩ ማኣርይዳ ማድ ማዲንቶ ሜሆኮ ዛላንታ ካኣቲ ናብካዳናዖኦሬሞ ዓኣህሂ ዒንጌኔ፤ ዬይ ካኣታህ ዬያ ያኦሲሞ ዲማዴ ሜሆ ባብሎኔይዳ ዒዛኮ ካኣሽኮ ያኦዞ ማኣራ ዔኪ ዴንዲ ጌህኔ።

3 ዬካፓ ካኣቲ ናብካዳናዖኦሬ ዓሽፔናዜ ጌይንታያ ዒዛኮ ዶንዞ ሱኡጌሰኬያ ዲዒንቲ ሙኬ ዒሰራዔኤሌ ዓሶ ባኣካፓ ካኣቲ ማኣሪ ዓሲ ማዔያና ሱኡጌ ማዒ ዋይህ ዓሲናኮ ናይ ማዔ ዴጌ ናይ ዳካ ዶኦሪ ዔኪ ዬዓንዳጉዲ ዒይህኔ፤

4 ዶኦሪንታኒ ኮይሳ ዴጌዞንህ ካኣቱሞ ማኣርይዳ ማድ ማዲኒ ዳንዳዓያ፣ ሚዛጲ፣ ዔራቶና ጳቂሥህና ዓኣያ፣ ዔኤቢ ቢያ ዑኬና ዔራኒ ዳንዳዓያ፣ ዑህ ቢያ ኩሙህ ማዔያኬ ጌይንቲኔ፤ ዬንህሂ ዴጌዞንህ ዔኪ ሙካዖ ባብሎኔ ዓሶ ዳንጎንታ ፃኣፖ ጎይዖዋ ዔርዛንዳጉዲ ካኣቲ ፔ ዶንዞ ሱኡጋህሂ ዒይህኔ።

5 ገንህ ሃህ ዔያታ ሙዓንዳ ሙዖና ዑሽካንዳ ዋይሮ ዑዠ ካኣቲሞ ገኢገሸናህፓ ዔውቲ ዒንገንታንዳጉዲ ካኣቲ ዒይህኔ፤ ዬያይዲ ዔያታ ኮይሳ ባኮ ሃይህ ለዔ ዴዒ ዔሬሰካፓ ካኣቲ ቤርቶ ሺኢኪ ጳዲ ካኣቱሞ ማኣር ማድ ማዲንዳጉዲ ጌይንቲኔ።

6 ዬያቶ ዶኦሪንቲዞንህ ባኣካ ዪሁዳ ፃጲ ማዔያ ዳኣኔኤሌ፣ ሃናኒያ፣ ሚሳዔኤሌንታ ዓዛሪያ ጌይንታሰኬንህሂ ዓኣኔ።

7 ዬይ ካኣቲኮ ዶንዞ ሱኡጋህሂ ዔያቶኮ ሱንዖ ላኣሚ፡- ዳኣኔኤሌኮ ቢልፃሶኦሬ፣ ሃናኒያኮ ሲዲራቄ፣ ሚሳዔኤሌኮ ሚሳቄ፣ ዓዛሪያኮ ዓብዲናኣጎ ጌይ ጌህኔ።

8 ዳኣኔኤሌ ዒማና ካኣቲ ሙዖ ሙዒ ዑዠዋ ዑሽኬቲ ዒ ካኣሽካ ያኦሲ ዬያ ዒይህሰኣያታህሂ ዔሪ፣ ፔና ዒኢሳዓ ጌይ ዒፃኔ፤ ዬያ ማሊዖ ዒዛኮ ዓሽፔናዜ ዔኤዓንዳጉዲ ዒዚ ሺኢቄ።

9 ያኦሲ ዬያ ሱኡጋህሂኮ ዒና ዳኣኔኤሌ ቦንቺ ሚጪንታንዳጉዲ ኮሺኔ።

1:1 2ካኣቶ. ማ 24:1፤ 2ያኦሲ. ዓሃኬ 36:5-7። 1:4 2ካኣቶ. ማ 20:17-18፤ 24:10-16፤ 2ያኦሲ. ዓሃኬ 36:10፤ ዒሲ. 39:7-8።

10 ጋዓንቴ ዩይ ዓሸፔናዜ ካኣቴ ዒጊጨሚር ዳኣኔኤሌ ኮይሉ፡- «ሙዖና ዑዠና ዒንሢሞ ዒንጋንዳጉዲ ዓይሢሢ ፔኤር ካኣቴከ፤ ዒንሢ ማሌ ዴጌ ናኣቶፓ ባሼ ዖኦፒ ዴዴቴ ካኣቴ ታና ዎዳንዳኔ ጌይ ታ ዒጊጨኔ» ጌዔኔ።

11 ዩካፓ ዳኣኔኤሌ ዒዛንታ ዒዛኮ ላጎ ሃናኒያ፡ ሚሳዔኤሌንታ ዓዛሪያንታ ካፓንዳጉዲ ዓሸፔናዜ ዓይሢ ጌሢ ዓሲሰከያ ኮይሉ ዴንዳዖ፡-

12 «ኦኡኒ ሳኣሚ ዋላሺ ሙዒ ሙዒ፣ ሃሃ ዋኣሢ ዑሽኪ ዑሽኪ ዴዓንዳጉዲ ማሃጋፓ ኦና ዴንዲ ታጾ ኬሊ ሄላንዳኣና ዛጌ፤

13 ዩያይዴሰካፓ ካኣቱሞ ማኣራፓ ዓይሢንቴ ሙዖ ሙዓ ዴጌዘንሢና ዎላ ኦና ቤቁሢ፤ ኔ ዛጋንቴ ፓጨ ባኣዚ ኦጊዳ ዴዴቴ ኦና ኔ ዓይሎይዳ ኮይሰ ባኣዚ ማዴ» ጌዔኔ።

14 ዩይ ዔያቶ ካፓሢ ዩኖ ማሊዖና ዔኤዒ ታጾ ኬሊ ሄላንዳኣና ዔያታ ጌዔ ጎይዖ ማዲ ዎይታቴያ ዛጌኔ።

15 ታጾ ኬላ ጋፓዛ ካኣቴ ማኣር ሙዖ ሙዓ ዴጌዘንሢ ላሼ ዔያቶኮ ዓኣፖ ካራ ሚዛጲ፣ ዑፃኣ ዲጨ ዴዴኔ።

16 ዩማፓ ዓርቃዖ ዩይ ካፓ ዓሢ ካኣቱሞ ማኣራፓ ዳከንታ ኮዦ ሙዖና ዎይና ዑዠና ሃሺ ዔያቶሞ ሳኣሚ ዋላሺና ጊኢጊሻና ሙኡዚ ሌሊ ዒንጊሢ ዓርቁኔ።

17 ዖኦሲ ዩንሢ ዖይደ ዴጌዘንሢሞ ዓይጎ ዔራቶዎ ማዖም ፃኣፖ ባኣዚያ ዔራጎዳ ዔራቶና ጳቂሥሢና ዒንጌኔ፤ ዳኣኔኤሌ ጊንሢ ዩያቶ ባኣካፓ ዖኦሲ ፔጋሲ ዳዎ ባኣዚንታ ዓውቴንታ ቡላ ዔራቶ ዓኣ ዓሲ ማዔኔ።

18 ካኣቴ ጌዔ ሃይሃ ለዓ ጋፓዛ ዓሸፔናዜ ዶኦሪንቴ ዴጌዘንሢ ቢያ ዔኪ ካኣቴ ናብካዳናዖኦሪ ቤርቶ ሺኢሹኔ።

19 ካኣቴ ዩያቶ ቢያሢና ጌሰቴ ዛጋንቴ ዩያቶ ባኣካ ዳኣኔኤሌ፣ ሃናኒያ፡ ሚሳዔኤሌንታ ዓዛሪያንታጉዴ ዴጌ ፔቴታዖ ዴዲባኣሴ፤ ዩያር ዔያታ ካኣቴ ማኣራ ማዳንዳጉዲ ዶኦሪንቴኔ።

20 ዔኤቢ ዔሪሢና ጳቂሥሢና ካኣቴ ዖኦጫ ባኮኮ ካኣቴ ዎይሃ ዓጮይዳ ዓኣ ዦዎና ማርሻ ማርሻ ዓሶፓ ቢያ ታጾ ጳንጨፍ ማዓያ ዔራ ማዒ ዔያታ ዴዴኔ።

21 ዳኣኔኤሌ ዩያይዲ ዴንዲ ካኣቴ ቁኢርሴ ካኣታዴ ቤርታሳ ሌዖ ሄላንዳኣና ካኣቱሞ ማኣራ ማዳያ ማዒ ዴዔኔ።

2

ናብካዳናዖኦሪ ዓውታዴ ዓውቶ

1 ካኣቲ ናብካዳናጾኦሪ ካኣታደፎ ላምዓሳ ሌዖና ዓውቲ ዓውታደፎ፤ ዒዚ ይያ ዓውቶና ሜታዲ ገንፖ ባይዜ።

2 ይያር ዒዛም ሙኪ ይያ ዓውቶ ቡሊ ኬኤዛንዳጉዲ ዠዩንታ ማርሻ ማርሻ ዓሲንታ ዓማቶንታ ካላዳ ዓጮይዳ ዠኦጋህ ፓይዲ ፓይዲ ዔቦ ዔራ ዓሶዋ ዒ ዔኤሊሴ፤ ይይ ዓሳ ዒማና ሙኪ ቤርታ ዒዛኮ ዔቄ፤

3 ካኣቲ ዔያቶ ኮራ፡- «ታኣኒ ዓውቲ ዓውታደፎ ይና ዓውታ ዓይጎታቴያ ታ ዔራኒ ሚርጌና ማሊ ሜታደፎ» ጌዔ።

4 ዔያታ ማሃፖ ዓራማይኬ ሙኡቸና፡- «ካኣቲዮ፡ ናንገና ካኣታዲ ናንገ! ኔ ዓውታደፎ ዓውታ ዓይጎታቴያ ኦም ኬኤዜ፡ ኦ ኔኤም ቡሊፖ ኬኤዛንዳ።» ጌዔ።

5 ካኣቲ ዔያቶም፡- «ቤርታሳፖ ታ ዓውታደፎ ዓውቶ ኬኤዙዋቴ፡ ሄሊሳፖ ዋዚ ጋዓ ቡሊህ ዓኣቴያኣ ኬኤዙዋቴ፤ ዒንህ ኬኤዚባኣቴ ዒንህ ጨርከንቴም ማኣራኣ ዒንህኮ ፒዖና ቡኡራ ላኣሎ ቤሲ ማዓንዳጉዲ ታ ጌዔ።

6 ታ ዓውታደፎ ዓውቶና ቡሊፖና ታኣም ዒንህ ኬኤዜቴ ታ ዒንህም ዒንጎ ባኣዚና ዴኤፒ ቦንቸንቲና ዒንጋንዳ፤ ይያር ታ ዓውታደፎ ዓውቶንታ ዋዚ ጋዓ ቡሊህ ዓኣቴያ ዋላ ኬኤዙዋቴ» ጌዔ።

7 ዔያታ ገንህ፡- «ካኣቲዮ! ኔ ዓውታደፎ ዓውቶ ኦና ኔ ዓይሎም ኬኤዜቴራ፡ ኦ ኔኤም ዋዚ ጋዓ ቡሊህ ዓኣቴያ ኬኤዙዋ» ጌዔ።

8 ካኣቲ ይያ ዔያታ ጋዓዛ ዋይዛፖ፡- «ታኣኒ ያዲ ማፖንጎ ጌዔ ባካ ደዲ ማዔህ ዒንህ ዔሪ ዋዴ ጎቻኒ ጌሰታህ ታ ዔሪ፤

9 ዒንህ ታ ዓውታደፎ ዓውቶ ኬኤዛኒ ዳንዳዒባኣቶ ዒንህ ቢያህዳ ፔቴ ሄላንዳ ሜታ ዓኣ፤ ታ ይያ ጌዔ ባኮ ታኣኒ ገንህ ሸርሻንዳያ ዒንህም ማሌም ሉኡዚ ባኣዚ፡ ሃህ ጌ፤ ባኣዚ ኬኤዚ ኬኤዚ ጉሪ ዋዶ ዒንህ ጎቻኒ ማሌ፤ ይያር ዒንህ ዓውቶ ታኣኮ ኬኤዜቴ ቡሊፖ ዒንህ ባሽንዳዋኣህ ታ ዔራ።» ጌዔ።

10 ዒማና ካላዳ ዓጮይዳ ዠኦጋህ ፓይዲ ፓይዲ ዔቦ ዔራ ዓሳ፡- «ካኣቲዮ! ኔኤኒ ዔራኒ ኮዓ ባኮ ኔኤም ኬኤዛኒ ዳንዳዓ ዓሲ ዓይጎ ዓጨዳኣ ጴዳዓኬ፤ ፔቴ ካኣቲ ዋዚዒ ዴኤፒ፡ ሃህ ዋልቃዳያ ማዓቴያ ይያጉዴ ጾኦጨህ ዠዋንታ ማርሻ ማርሻ ዓሶንታ ዠኦጋህ ፓይዳ ካሶ ኮራኣ ጾኦጨ ቤቂባኣሴ።

11 ካኣቲዮ! ኔ ይያ ጾኦጨ ዴኤፖ ጾኦጨ ጌዒ ካኣሽኮ ባኮፓ ዓቴም ሜሌ ማሂ ኬኤዛንዳ ዓሲ ባኣሴ፤ ይይ ጾኦፊ ጌይ ካኣሽኮ ባካ ሃይካ ዓሲባኣካ ናንጋያቴዋሴ» ጌዔ።

2:2 ማገሩ ማፃ 41:8።

12 ዬያሮ ካኣቲ ሚርገና ደጋዲ ባብሎኔ ዓጮይዳ ዓኣ ዔሮ ዓሳ ጉቤ ዎዲንታንዳጉዲ ዓይሣኔ።

13 ዔሮ ዓሳ ዎዲ፤ ማለንቲ ማሊያና ዔቃዎ ዳኣኔኤሌንታ ዒዛኮ ላጎዎ ዎላ ዎዲ፤ ዔያታ ማሌኔ።

ዓውቶኮ ቡሊያ ያኦሲ ዳኣኔኤሌም ፔጋሴሣ

14 ዬያ ዓይሣያ ማዲ ኩንሣንዳጉዲ ዓይሣንቲሣ ካኣቲ ካፓ ፖኦሊሶ ዓይሣሣ፤ ዓሪዮኬ ጎዎሣኬ፤ ዳኣኔኤሌ ዒማና ዬያ ዓሣ ኮይላ ዴንዳዎ ዔራቶና፡-

15 «ካኣቲ ዬያ ዴኤያ ዓይሣያ ዎይታዛ ኬሴይ?» ጌዒ ያኦጩኔ፤ ዬያሮ ዓሪዮኬ ዳኣኔኤሌም ጎይያ ኮሺ ኬኤዘኔ።

16 ዬካፓ ዳኣኔኤሌ ኔጉዎዎ ካኣቲ ኮይላ ጌሊ ዓውቶ ቡሊያኮ ዳካ ዎዴ ዒንጋንዳጉዲ ሺኢቄኔ።

17 ዬያዴሰካፓ ዳኣኔኤሌ ፔ ማኣሪ ዴንዳዎ ጌይንቲ ባኮ ዒዛኮ ላጎ ማዔ ሃናኒያ፤ ሚሳዔኤሌንታ ዓዛሪያንታም ኬኤዘኔ።

18 ገንሣ ሃንጎ ባብሎኔይዳ ዓኣ ዔሮ ዓሶና ዎላ ዎዲንቲዎጉዲ ጫሪንጮ ያኣዛሣ ዔያቶ ሚጨንቲ ማኣዳንዳጉዲና ዬኖ ዓውቶኮ ቡሊያዎ ፔጋሲ ኬኤዛንዳጉዲ ሺኢቆም ፔ ላጎንሣ ዒ ዓይሣኔ።

19 ዬኖ ዎንቲሎ ዓኣሺንቲ ባኮ ዳኣኔኤሌም ያኦሲ ፔጋሲ ዳቄኔ፤ ዬያሮ ዒዚ ጫሪንጮ ያኣዛሣ ሂዚ ጌዒ ጋላቲኔ፡-

20 «ዔራቶንታ ዎልቄንታ ዒዛሮ ማዔሣረ ያኦሲ ናንገና ጋላቲንቶንጎ!

21 ዒዚ ዎዶና ሌያና ላኣሚ ላኣሚ ዔኪ ዬይሳኔ፤ ካኣቶ ካኣቱም ያይታ ዴይሣኔ፤ ያይታፓኣ ኬሣኔ፤ ዔራቶ ዔሮ ዓሶም፤ ጨንጨም ማሊ ጰቂሣ ዓሶም ዒንጋሣ ዒዛኬ።

22 ዒዚ ዔርታኒ ዳንዳዑዎ ባኮንታ ዓኣሺንቲ ባኮዎ ፔጋሳኔ፤ ዒዛ ኮይላ ቢያ ዎዴ ፖዒ ዓኣሣረ፤

ዴሚዳ ዓኣሺንቲ ባኮ ዒ ዔራኔ።

23 ታኣኮ ቤርታኣ ዓዶንሣኮ ያኣዛሣዮ! ታ ኔና ጋላታኔ፤ ታ ኔና ዴኤፕሳኔ፤

ኔኤኒ ዔራቶንታ ዎልቄንታ ታኣም ዒንጌኔ፤ ኑኡኮ ኔ ሺኢዲያ ዎይዚ ካኣቲኮ ዓውቶ ኔ ኑም ፔጋሴኔ።»

ዳኣኔኤሌ ካኣቲኮ ዓውቶ ቡሊያና ዎላ ኬኤዘሣ

24 ዬካፓ ዳኣኔኤሌ ባብሎኔይዳ ዓኣ ዔሮ ዓሶ ዎዲንዳጉዲ ካኣቲ ዓይሣ፤ ዓሪዮኬ ኮይላ ዴንዳዮ፡- «ባብሎኔይዳ ዓኣ ዔሮ ዓሶ ዎዲ፤ ሃሣ ታና ካኣቲ ኮይላ ዔኪ ዓኣዴ፤ ዓውቶኮ ቡሊያ ታ ዒዛም ኬኤዛንዳኔ» ጌዔኔ።

25 ዬማና ዓሪዮኬ ዳኣኔኤሌ ኔጉዋዎ ካኣቲ ናብካዳናዖኦሬ ቤርቶ ዓኪ ሺኢሻዮ፡- «ካኣቲዮ! ኔኤኮ ዓውቶኮ ቡሊዖ ኔኤም ኬኤዛንዳያ ዲዒ ዓኪ ዬዖና ዩሁዳ ዓሶ ባኣካፓ ፔቴ ዓሲ ታ ዳንቄኔ» ጌይ ካኣቲም ኬኤዜኔ።

26 ዬያር ቢልፃሶኦሬ ጌይንታ ዳኣኔኤሌ ኮይላ ካኣቲ፡- «ታኣኒ ዓውታዳ ዓውቶንታ ቡሊዖንታ ታኣም ኔ ኬኤዛኒ ዳንዳዓ?» ጌይ ዖኦጩኔ።

27 ዳኣኔኤሌ ማሃዮ፡- «ካኣቲዮ! ኔኤኒ ዖኦጩ፣ ዬያ ዓኣሺንቴ ባኮ ዔር ዓሶዋ ማዖም ማርሾ ማርሻ ዓሳ፣ ዠዋታቴያ ዓማታ ኔኤም ኬኤዛኒ ዳንዳዑዋሴ።

28 ጋዓንቴ ዓኣሺንቴ ባኣዚ ቢያ ፔጋሲ ዳዋ ፔቴ ዖኦሲ ጨሪንጫ ዓኣኔ፤ ሃጊ ሴካ ማዓንዳ ባኮ ቢያ ዒዚ ኔኤም ፔጋሲ ዳዋ፤ ኔኤኒ ላሄ ሻኦይዳ ዓኣዖ ዓውታዳ ዓውቶና ኔ ዒኖይዳ ኔኤም ዖኦሲ ፔጋሲ ዳዋ ባካ ያዲኩ፡-

29 «ካኣቲዮ! ኔኤኒ ኔኤኮ ሻኦይዳ ላሃ ዓኣዖ ሃጊ ሴካ ቤርታ ማዓንዳ ባኣዚ ማሌኔ፤ ዬያር ዓኣሺንቴ ባኣዚ ፔጋሲ ዳዋ ዖኦዛሂ ሃጊ ማዓንዳ ባኮ ኔኤም ዔርዜኔ።

30 ዬይ ዓኣሺንቴ ባካ ታኣም ፔጋዲ ጴዴሂ ሜሌ ዓሶፓ ባሽ ታ ዔራ ማዔሂርቱዋሴ፤ ጋዓንቴ ኔኤኒ ዬያ ዓውቶኮ ቡሊዖ ዔራንዳጉዲና ኔ ዒኖ ጋራ ኔ ሺርሺ ሺርሺ ማሌ ባኮ ጴዴሂ ኔ ዒና ዔካንዳጉዲኩ።

31 «ካኣቲዮ! ዑሃ ዓኣዳ ዓኣፒዳ ዲካያ፤ ዬያይዳፓ ዔቄያና ዘጋኒያ ዓጊቻ ፔቴ ዓሲ ማላ ዳኤፒ ባኣዚ ኔ ቤርታ ዔቄ ዓኣንቴ ኔ ዛጌኔ።

32 ዬያ ባካሂኮ ቶኦካ ጌኤሽ ዋርቄና፣ ዳዶና ኩጮና ቢራ ዓንጊና፣ ጎጶና ጉባዞና ሞኦና ዓንጊና፣

33 ዘኣላ ዓንጊና፣ ቶኮ ዜዶኮ ዘላ ዓንጊና፤ ዘላ ጊንሃ ዠኢጩ ዓጠና ኮሾናያኩ።

34 ኔኤኒ ዬያ ባካሂ ዘጋንቴ ዳኤፒ ሹቺ ዓሲ ኮላሱዋንቴ ቡጊንታዖ ኮላዲ ኬዳኔ፤ ዬይ ኬዳ ሹጫሂ ዓንጎና ዠኢጩ ዓጮና ኮሾና ቶኮ ዜዶ ማንሂኔ።

35 ዬይ ሹጫ፣ ዠኢጩ ዓጮና ማዠናሂ፣ ሞኦና ዓንጋ፣ ቢር ዓንጎንታ ዋርቆንታ ኔጉዋዖ ሜቄ ጋኣጠንቴ ዖጎሂና ቆይዳይዳ ሺርኪ ሃሾና ዲልባ ማዔኔ፤ ዬያ ዲልባ ፔቴታዖ ዓይሱዋዖ ዠባሬ ፒዒ ዓኪ ዳንዳኔ፤ ጋዓንቴ ዬያ ባካሂዳ ኬዳ ሹጫሂ ዓጮ ቢያ ኩሚ ዳግ ዳግ ጋዓዖ ዳኤፒ ዲካ ማይ ዳዔኔ።

36 «ዋይዜ፥ ዓውታ ዩያኬ፤ ቡሊፃ ሃካፓ ዴማ ኬኤዚንታ ጎይጾጉዴያኬ፡-

37 ካኣቲዮ! ኔኤኒ ቢያፓ ባሼ ካኣቶኮ ካኣቲኬ፤ ጩሪንጮ ጾኦዛሢ ካኣቲዮ፥ ዋልቁ፥ ቢታንቶንታ ቦንቸንታ ኔኤም ዒንጌኔ።

38 ዓጮ ቢያ ኔና ዋይሣያ ማሄኔ፤ ዓሰንታ ቦጾንታ ካፒንታይዳ ቢታንቶ ኔኤም ዒዚ ዒንጌኔ፤ ዩያሮ ዋርቆ ማዔ ቶኦካሢ ኔናኬ።

39 ኔኤኮ ገንፃፓ ዴኤፑሞና ኔገዳፓ ሃታ ካኣታ ኬሰካንዳኔ፤ ዩያፓ ሄሊሳጾ ዓጮ ቢያ ዋይሣንዳያ፥ ሞኦኖ ዓንጎና ማሊሶናሢ፥ ሃይሣሶ ቤዘ ዓርቂ ኬሰካንዳኔ።

40 ሃሣ ገንሣ ዩያ ቢያሢ ማንሢ ጋኣጫያ፥ ዓንገጉዲ ደዳያ፥ ጾይዳሳ ካኣታ ኬሰካንዳኔ፤ ዓንገ ቢያ ባኣዚ ማንሢ ጋኣጫሢጉዲ ዒዚ ዒዛኮ ቤርታ ዓኣ ካኣቶ ቢያ ማንሢ ጋኣጫንዳኔ።

41 ዔባሢቶ ቶኮ ዜዶና ኬኤሎናኮ ማዢንታ ዛላ ዓንገ፥ ዛላ ዢኢጮ ዓጪናታሢ ኔ ዛጌኔ፤ ዩይ ዳዋሢ ዩይ ካኣታ ፓቂንቴ ካኣቶታሢኬ፤ ዓንጎንታ ዢኢጮ ዓጮና ኮሾና ባኮንታ ሲኢሪንቴንቴ ኔ ዛጌ ጎይጾ ዩይ ካኣታ ዋይሣ ዓጮኮ ዛላ ሹቸጉዲ ደዳንዳኔ።

42 ዩያ ባካሢቶ ቶኮ ኬኤሎ ማዢፃ ዛላ ዓንገ፥ ዛላ ዢኢጮ ዓጪና ኮሾና ባኣዚ ማዔሢጉዲ ዩይ ካኣታሢ ዋይሣ ዓጮኮ ዛላ ደዲ፥ ዛላ ላቤያ ማዓንዳኔ።

43 ዓንጎንታ ዢኢጮ ዓጮና ኮሾና ባኮንታ ዋላ ሲኢሪንቴንቴ ኔ ዛጌ ጎይጾ ዩንሢ ላምጾ ካኣቶንሢቶ ዴራ ዋላ ዔፒና ሲኢሪንታንዳኔ፤ ጋዓንቴ ዓንገና ዢኢጮ ዓጪና ዋላ ሲኢሪንታን ደንዳዑዋኣሢጉዲ ዩያታ ፔቴ ማዓኒ ደንዳዑዋሴ፤

44 ዩንሢ ካኣቶንሢ ዋደና ፔቴታጾ ደዓኒ ደንዳዑዋያ፤ ገንሣ ሃሣ ማሌ ዴሬ ጩርቂ ጌሊ ጾላኒ ደንዳዑዋ ካኣቶ ጩሪንጮ ጾኦዛሢ ዔቂሳንዳኔ፤ ዩይ ካኣቲ ማሌ ካኣቶ ዴንዲ ጋፒንሢ ሄላንዳኣና ባይዛንዳኔ፤ ዒዚ ጋዓንቴ ናንገና ደዲ ናንጋንዳኔ፤

45 ዓሲ ኩቸ ካኣሙዋንቴ ዲኮይዳፓ ቡገንቴ ኬዲ ዓንጎና፥ ሞኦኖ ዓንጎና፥ ዢኢጮ ዓጮና፥ ቢሮ ዓንጎና፥ ዋርቆና ማዢና ባኮ ማንሢ ጋኣጫ ሹጫሢ ዩያ ካኣታሢኬ፤ ዩያይዲ ዴኤፖ ጾኦዛሢ ሃገ ማዓንዳ ባኮ ቢያ ኔኤም ዳዌኔ፤ ዋይዜ፥ ዓውታ ጎኔ ዓውቲኬ፤ ፒዜ ማዔ ቡሊፃኣ ያዲኬ።»

ካኣቲ ዳኣኔኤሌም ዒንጌ ባኮ

46 ዩካፓ ካኣቲ ናብካዳናጾኦሪ ባሊቶ ሳጾ ሄሊሲ ዳኣኔኤሌም ዘጌኔ፤ ዓሳ ዒዛም ሃኣኮ ዒንገሢንታ ዑንጂያ ጩቢሻንዳጉዲ ዓሶ ዓይሣኔ።

47 ካኣቲ ዒማና ዳኣኔኤሌም፡- «ኔኤኮ ጾኦዛሢ ካኣሽኪንታ ጾኦዛሢታ ቢያ ባሽኬ፤ ካኣቶኮ ቢያ ጎዳኬ፤ ዓኣሽንቴ ባኣዚ ቢያ ፔጋሲ ዔርዛኒ ዳንዳዓያኬ፤ ዬያሮ ኔኤኒ ሃያ ዴኤፖ ዓኣሽንቴ ባኮ ፔጋሲ ዔራኒ ዳንዳዔኔ» ጌዔኔ።

48 ዬካፓ ካኣቲ ዳኣኔኤሌ ዴኤፒ ቦንቸንታ ቤሰካ ዔኪ ጌሄኔ፤ ማርጌ ባኣዚያ ዒዛም ዒንጌኔ፤ ባብሎኔ ዓጮይዳ ቢያሢ ዎይሃያ ዒዛ ማሄኔ፤ ባብሎኔይዳ ዓኣ ዔሮ ዓሶኮዎ ቢያ ዒዛ ሱኡጌ ማሄኔ።

49 ዳኣኔኤሌ ካኣቲም ኬኤዜም ሲዲራቄንታ ማሳቄንታ ዓብዲናኣጎንታ ባብሎኔኮ ዲማ ዲማ ፓቆና ዓጮ ቢያሢዳ ዎይሃ ዓሲ ማሃ ካኣቲ ዔያቶ ዶኦሬኔ፤ ዳኣኔኤሌ ጋዓንቴ ካኣቲም ማኣራ ዴዔኔ።

3

ናብካዳናጾኦሬ ዎርቆ ዓንጎና ኮሺሴ ባኮ

1 ካኣቲናብካዳናጾኦሬ ሌካ ዒዳ ላሂታሚ ዎዳ፣ ዳልጉማ ላሆ ዎዳ ማዓ ዓሲ ማላ ባኣዚ ዎርቆና ማዢሲ ባብሎኔ ዓጮይዳ ዓኣ ዲራ ጌይንታ ቦኦሎይዳ ዶቂሴ።

2 ዬያ ባካሢ ዓንጂ ማዶይዳ ፔኤሻኒ ጌይ ቦንቸንታ ቦንቸይዳ ሙካንዳጉዲ ዓጮ ዎይሃ ዓሶ፣ ዴኤፖ ዴኤፖ ሱኡጎ፣ ዒዛኮ ዶንዘ፣ ዒዛኮ ዓኣ ቆሎ ዎይሃ ሱኡጎ፣ ዎጎ ዎጋ ዓሶንታ፤ ዬያጉዲ ፔቴ ፔቴ ዓጮይዳ ቢታንታ ዓኣ ዓሶዎ ዒዚ ዔኤሌኔ።

3 ዬይ ቢታንታ ዓኣ ዓሳ ቢያ ዬኖ ቦንቸ ኬሎ ፔቲምና ሙኪ ቡካዖ ዬያ ማዢ ዶቆና ባካሢኮ ቤርታ ዔቄኔ፤

4 ዒማና ፔቴ ዒላቲ ዔኤቢ ኬኤዛ ዓሲሰኬይ ፔኤኮ ዑኡዛ ዴገዲ፡- «ዒንሢ ዲማ ዲማ ዓጮፓ ሙኬ ዴሮንታ ዲማ ዲማ ሙኡጮ ጌሰታ ፃዳ!

5 ዒንሢ ዛዬ፣ ዲንካ፣ ፔቴ ሻሺ ዴንሃ ጎኦላ፣ ዲቢ ሻሺና ዴንሃ ጎኦላንታ ሹሉንጎንታ፤ ዬያጉዲ ዓይኦም ዓይናዶ ባኣዚኮ ቢያ ዑኡሲ ዎይዜ ዎዶና ሳዓ ሎኦሚ ላሂ ካኣቲናብካዳናጾኦሬ ዎርቆና ኮሺ ዶቂ ዔቄሴ ዓሶ ማላ ባካሢም ዚጋንዳጉዲ ካኣቲ ዓይሄኔ!

6 ሳዖይዳ ሎኦሚ ላሂ ዚገባኣ ዓሲ ዓኣቶ ዴኤፖ ዔኤታ ታዎይዳ ቤዘማና ዓገንታንዳኔ!» ጌዔኔ።

7 ዬያሮ ዴራ ዬያ ዎርቄንታ ባኮኮ ዑኡዛ ቢያ ዎዎይዛዖ ሳዖይዳ ሎኦሚ ላሂ ካኣቲናብካዳናጾኦሬ ዎርቆና ኮሺ ዶቂ ዔቄሴ ዓሶ ማላ ባካሢም ዚጌኔ።

ዳኣኔኤሌኮ ላጎንሢ ዎጌና ዓይሢሶናሢ

8 ዲማና ባብሎኔ ዓጮይዳ ዠኦጎ ዛጊ ዔቦ ዔራ ዔሮ ዓሶፓ ዛላ ዓሲ ዓይሁዶ ዓሳ ዎጊና ዓርቂንታንዳጉዲ ካኣቲም ኬኤዜኔ።

9 ዔያታ ካኣቲ ናብካዳናፆኦሬ ኮይላ ሙካዎ፡- «ካኣቲዮ! ናንጊና ናንጊ!

10 ካኣቲዮ! ኔኤኒ ዛዬ፥ ዲንካ፥ ፔቴ ሻሺ ዴንሠ ጎኦላ፥ ዲቢ ሻሺ ዴንሠ ጎኦላ፥ ሹሉንጎንታ ዲማ ዲማ ዓይኑምሮ ዋርቆ ባኮኮ ዑኡዞ ዋይዜ ዓይጎ ዓሲያኣ ሳፆይዳ ሎኦሚ ላሂ ዎርቆና ኮሺንቴ ዓሶ ማላ ባካሂም ዚጋንዳጉዲ ዓይሂባይ፤

11 ሃሃ ኔኤኒ ሳፆይዳ ሎኦሚ ላሂ ዚገባኣ ዓይጎ ዓሲያኣ ማፆም ዔኤታ ታም ዴኤፖይዳ ዓጊንታንዳጉዲ ዓይሂባይ፤

12 ሃይሾ ሃሂ ባብሎኔ ጋራ ዓኣ ዓጮ ዎይሃንዳጉዲ ኔኤኒ ዶኦሪ ጌሂ ሲዲራቄንታ ሚሳቄንታ ዓብዲናኣጎ ጌይንታ ዓይሁዶንሂ ኔኤኮ ዓይሂዎ ኩንሠታዎሴ፤ ኔኤኮ ፆኦዞ ዋኣሽኩዎሴ፤ ኔ ኮሺ ዔቂሴ ዓሶ ማላ ባካሂማኣ ዚጉዎሴ» ጌዔኔ።

13 ካኣቲ ዬያ ዎይዛፆ ሚርጌና ዳጋዲ ሲዲራቄ፥ ሚሳቄንታ ዓብዲናኣጎንታ ዔኤሊንታንዳጉዲ ዓይሂኔ፤ ዬያሮ ዔያታ ካኣቲ ቤርቶ ሺኢኬኔ።

14 ናብካዳናፆኦሬ ዔያቶ ኮይላ፡- «ዲንሂ ሲዲራቄ፥ ሚሳቄንታ ዓብዲናኣጎንታ! ታኦኮ ፆኦዞ ዲንሂ ካኣሽኪባኣሂና ታኣኒ ዎርቆና ኮሺሲ ዔቂሴ ዓሶ ማላ ባካሂማኣ ዲንሂ ዚገባኣሂ ጎኔዳ?

15 ዛያሂ፥ ዲንካሂ፥ ፔቴ ሻዠ ጎኦላ፥ ዲቢ ሻዠ ጎኦላ፥ ሹሉንጎንታ ዓይኑምሮ ዋርቆ ባኮ ቢያሂኮ ዑኡዞ ዲንሂ ዎይዛፆ ታኣኒ ኮሺ ዔቂሴ ዓሶ ማላ ባካሂም ሳዓ ሎኦሚ ላሂ ዚጌያ ማዔቴ ቃራ፤ ዚገባኣያ ማዔቴ ጋዓንቴ ዔኤታ ታም ዴኤፖ ዔቶይዳ ቤዞና ሃሂ ዲንሂ ኬኤሪንታንዳኔ፤ ታ ኩጫፓ ዲንሂ ዓውሳንዳ ፆኦሲ ባኣሂ ዔሩዋቴ» ጌዔኔ።

16 ሲዲራቄ፥ ሚሳቄንታ ዓብዲናኣጎንታ ካኣቲም ማሃዎ፡- «ካኣቲዮ! ዬዮ ዛሎኮ ኦኡኒ ኦና ዓውሳኒ ሞኦታንዳ ሃይሴ ኬኤዛኒ ኮይሱዎሴ።

17 ኦኡኒ ዒዛም ማዲ ዒዛ ካኣሽካ፥ ፆኦዞሂ ሃያ ዔኤታ ታምይዳፓኣ ማፆም ኔ ኩጫፓ ኦና ዓውሳኒ ዳንዳዓኔ፤

18 ካኣቲዮ! ዒዚ ኦና ዓውሳኒ ኮዒባኣቴያ ኔኤኮ ፆኦዞም ኦ ማዲንዳዎኣሂና ኔኤኒ ዎርቆና ኮሺ ዔቂሴ ዓሶ ማላ ባካሂም ኦ ዚገ ካኣሽኪንዳዎኣሂያ ዔሬ» ጌዔኔ።

ዳኣኔሌሌኮ ላጎንሂ ፆኦሲ ጉሙርቂ ታማፓ ኬሰኬሂ

19 ዲማና ናብካዳናፆኦሬ ሲዲራቄንታ ሚሳቄንታ ዓብዲናኣጎንታይዳ ሚርጌና ዳጋዲ ፔኤኮ ዓኣፖ ካሮ ላኣሜኔ፤

ዬያሮ ዬያ ታሞ ዋንዴ ዔኤታሰካፓ ላንካይ ጳንጨጭ ማዓንዳያ ባሼ ማሂ ዔኤሠንዳጉዲ ዓሶ ዒ ዓይሄኔ።

20 ዬካፓ ዬንሢ ሃይሠንሢ ቱኪ ዔኪ ዬያ ዔኤታ ታሞይዳ ዓጋንዳጉዲ ዒዛኮ ሶሎ ዓሶ ባኣካፓ ዶዲ ዶዲ ማዓ ዓሶ ዓይሄኔ።

21 ዬያሮ ዬና ዓሳ ዔያታ ማኣዔ ሶዶዞ ማኣዓሢ፣ ቆንፃሢንታ ቶኦካ ዔያታ ማሪ ዓኣ ባኮንታ ማኣዔ ማኣሢ ሲያሢና ዋላ ቱኪ ዔኪ ዔኤታ ታሞ ዔቶይዳ ዓገኔ።

22 ካኣቲ ዓይሄ ዶዶ ዓይሢፃጉዴያና ታማ ዋልቄና ዔኤታሢሮ ሲዲራቄ፣ ሚሳቄንታ ዓብዲናኣንታ ዔኪ ታማ ኬኤሬ ዓሶ ታሞኮ ሼኤላ ሚቹ ዋደኔ።

23 ዬያታ ሃይሠንሢ ጋዓንቴ ዶዲሺ ቱኮና ጎይሢና ዓኣፃ ታሞ ዔኤታሢዳ ሎኦሜ።

24 ዒማና ኔጉዋፃ ካኣቲ ናብካዳናፃኦሬ ዴዔ ቤዛፓ ኮኦሚ ዔቃፃ፡- «ኦኤኒ ቱኪ ዔኪ ዔኤታ ታሞይዳ ዓገ ዓሶንሢ ሃይሠ ለለቱዋዓዳ?» ጌይ ፔ ዶንዞ ኮይላ ሶኦጩ። ዔያታ፡- «ካኣቲፃ፡ ጎኔኬ!» ጌዔ።

25 ካኣቲ ገንሣ፡- «ሃይሸ ሃኣዛጉዋቴ፣ ታኣኒ ታማ ፔቴታፃ ዔኤቢ ዋኦቲባኣያ፣ ቱኤዛፓኣ ቡሊንቲ፣ ዔኤታ ታሞ ባኣካ ሃንታ ሶይዶ ዓሲ ዴንቃ፤ ሶይዳሳ ዓሢ ሶኦዞ ናይ ማላያኬ» ጌዔ።

ሃይሠንሢ ታማፓ ኬሰኪ ሱኡጋቶ ዶኦሪንቴሢ

26 ዬካፓ ናብካዳናፃኦሬ ዔኤታ ታሞ ዔቶ ባይሢ ዑካፃ፡- «ዒንሢ ዴኤፖ ሶኦዛሢ ማዳ፣ ሲዲራቄንታ ሚሳቄንታ ዓብዲናኣንታ ዋይዙዋቴ! ኬሰኪ ሃኒ ዬዑዋቴ!» ጌይ ዔኤላዛ፣ ዔያታ ታማፓ ኬሰኪ።

27 ዒማና ዓጮ ዋይሣ ዓሶንታ ቢታንታ ዓኣ ዴኤፖ ዴኤፖ ዓሶንታ ካኣቲ ዘራ ዶንዞንታ ቢያ ዔያቶ ኮይላ ሙኪ ቡካፃ ታማ ዔያቶ ፔቴታፃ ዔኤቢ ዋኦቲባኣሢ፣ ቶኦኮ ጋሞኮዋ ፔቴታፃ ሚቹንቴባኣሢ፣ ዔያታ ማኣዔ ሶዶዞ ማኣዓሢኮ ማላቶ ታማ ላኣሚሲባኣሢና ማሌ ዓፓዛ ጩቢ ጩቢ ጌይ ዔያቶኮ ዑፃ ዛዒባኣሢ ዛገኔ።

28 ዬካፓ ካኣቲ ናብካዳናፃኦሬ፡- «ሲዲራቄንታ ሚሳቄንታ ዓብዲናኣንታ ሶኦዛሢ ጋላቲንቶም! ዒዚ ፔኤኮ ኪኢታንቻሢ ዳኪ ሃንሢ ዒዛም ማዳዘንሢ ዓውሴ፤ ዔያታ ፔ ሶኦዛሢ ጉሙርቄ ሲዛምቱዋንቴ ማሌ ሶኦዞም ኦዚጋዓኬ» ጌይሢና ካኣቲኮ ዓይሢፃ ካፖ ሃሺ ፔኤኮ ናንጎ ፑርታ ባኣዚዳ ዓገኔ።

29 «ጋዓንቴ ዬያይዲ ዓውሳንዳ ማሌ ሶኦሲ ባኣሴ፤ ዬያሮ ዓጮ ቢያይዳ ናንጋያ፣ ዲማ ዲማ ሙኡቹ ጌሰታ ዴሮ ቢያሢ ባኣካ ሲዲራቄንታ ሚሳቄንታ ዓብዲናኣንታ ሶኦዛሢ ጫሽካ ዓሲ ዴዴቴ

ዒ ቲቂንቲ ኬኤሪንቴም ማኣራ ዒዛኮ ፒፂ ኬኤሮ ቡኡራ ላኣሎ ቤሲ ማዓንዳጉዲ ታ ዓይሣኔ» ጌዔኔ።

30 ካኣቲ ዬያ ዓይሣያ ዳኬሰካፓ ሲዲራቁንታ ሚሳቁንታ ዓብዲናኣጎንታ ባብሎኔ ዓጮይዳ ዴግ ዴጊዲ ዶኦሪ ሱኡጌ ማሂ ጌሣኔ።

4

ናብካዳናጾኦሬ ላምዓሲ ዛጌ ዓውቶ

1 ዓጮይዳ ቢያ ናንጋ ዴሮና ዲማ ዲማ ሙኡጮ ጌሰታ ፃጰም ካኣቲ ናብካዳናጾኦሬ ሂዚ ጋዓ ከኢታ ዳኬኔ፡-

«ዒንሣ ቢያሣ ዎዚ ዓኣይ!

2 ዴኤፖ ጾኣዛሣ ታኣም ማዴ ዲቃሣ ሄርሺሳ ባኮና ዓኮ ባኮ ታ ዒንሣም ኬኤዛኒ ኮዓኔ።»

3 «ጾኦሲ ዳዎ ዓኮ ባካ ኮሺ ዴኤፒኬ!

ዒዚ ማዳ ዲቃሣ ሄርሺሳ ባካኣ ሚርጌና ዶዲኬ!

ጾኦሲ ናንጊና ካኣታዲ ናንጋያኬ፤

ዒዛ ካኣቱሞኮ ጋፒንሣ ባኣያኬ።»

4 «ታኣኒ፡ ናብካዳናጾኦሬ ታኣኮ ካኣቱሞ ማኣሮይዳ ጋርጎቹሞና ኮሺንታና ታኣም ዲቤም ታ ናንጊቤቃ፡

5 ፔቴ ኬሊ ታኣኮ ዓርሶይዳ ታ ላሂ ዓኣዎ ዓጊቻ ዓውቲና ጾኦሲ ፔጋሲ ዳቂያ ዲቃሣ ባኣዚ ዛጌኔ።

6 ዬያሮ ታኣኮ ዓውቶኮ ቡሊያ ታኣም ኬኤዛንዳጉዲ ባብሎኔ ዓጮይዳ ዓኣ ዔሮ ዓሶ ቢያ ታ ባንሣ ታ ዔኤሌኔ።

7 ዒማና ዠዎ፡ ማርሾ ማርሻ ዓሳ፡ ዠኦጋሣ ዛጊ ዔቦ ዔራ ዓሶንታ ዓማቶንታ ቢያ ታ ኮይላ ሙካዛ ታኣኒ ታኣኮ ዓውቶ ዔያቶም ኬኤዜኔ፤ ዔያታ ጋዓንቴ ታኣኮ ዓውቶ ቡሊ ኬኤዛኒ ዳንዳዒ ባኣሴ።

8 ዬካፓ ታኣኮ ጾኦዘ ሱንጾና ዔኤሊንታ ቢልፃሶኦሬ ጎጾ፡ ዳኣኔኤሌ ታ ኮይላ ጌሌኔ፤ ዬይ ዓሣ ጌኤዠ ጾኦዘኮ ዓያና ዒዛይዳ ዓኣ ዓሲኬ፤ ታኣኒ ዒዛም ታኣኮ ዓውቶ ሂዚ ጌይ ኬኤዜኔ፡-

9 «ዔሮ ዓሶኮ ሱኡጎ ማዔ ቢልፃሶኦሬ፡ ጌኤዠ ጾኦዘኮ ዓያና ኔ ጊዳ ዓኣሣሮ ዓኣሺንቴ ባኣዚ ቢያ ኔና ባሺንዲዎኣሣ ታ ዔራኔ፤ ዎይዜ፡ ታኣኒ ዛጊ ዓውቲ ታ ኔኤም ኬኤዛንዳኔ ኔኤኒ ታኣም ቡሌ።»

10 «ታኣኒ ታኣኮ ዓርሶይዳ ላሂ ዓኣንቴ ፔቴ ጾዶሲ ሚሣ ዓጮ ቢያሣኮ ሄኮማካ ባቃሌያ ፔጋዲ ታኣም ዴዴኔ።

11 ዬይ ሚፃሣ ቶኣካ ዴንዲ ጫሪንጮ ሄላንዳኣና፡ ዓጪ ማዔ ካራና ዓኣ ዓሲ ቢያ ዴንቃኒ ዳንዳዒ ጳጳሳጉዲ ዴኤፒ ዶዴኔ።

12 ዒላዠኩ ዋርቁፃ ሚዛጳያ ማዕኔ፣ ዓኣፓ ጊንሣ ዴሬ ቢያ ሙዔም ጊዳንዳጉዲ ዲቤኔ፤ ሺባ ካይዚ ቦም ጊኢጋያ ማዕኔ፣ ጫሪንጮ ካፓኣ ካኣፖይዳ ማኣሪ ማዢ ዴዕኔ፤ ሼምፔ ዓኣ ባኣዚ ቢያ ዬያ ሚፃሣኒ ዓኣፖ ሙዓኔ።

13 «ታኣኒ ታኣኩ ዓርሶይዳ ላሂ ዓኣንቴ ያኦሲ ታና ፔጋሲ ዳዌ ጎይያና ፔቴ ያኦሲም ዲማጴ ከኢታንቸ ጫሪንጫፓ ኬዳንቴ ታ ዴንቁኔ።

14 ዒማና ዬይ ከኢታንቸሣ ዴጌ ዑኡሲና፡- «ሚፃሣ ቲቁዋቴ፤ ካኣፖ ካኣፖዋ ሳንጉዋቴ፤ ዒላዠዋ ዠኡዲዋቴ፤ ዓኣፖዋ ዲኡዚ ዲኡዚ ላኣሉዋቴ፤ ካዮ ቦዓ ዒዛኮ ሺባፓ፣ ካፓኣ ዒዛኮ ካኣፓፓ ቤቲ ዴንደንጎ።

15 ጨኢሪንቲ ዓቲ ዴንጮ ጋዓንቴ ዓንጊና ሞኦና ዓንጊናፓ ኮሾና ካኒ ቢራታና ዓጮ ሺርሺ ቱኪ ሳይይዳ ሃሹዋቴ፤ ሳይይዳ ዓኣ ዓኣዔ ማኣቶ ባኣካ ዒኢካ ፖዓ ዒዛ ዔቂሲ ሃሹዋቴ።

« ጫሪንጮ ያልካ ዒኢካ ዒዛይዳ ያደንጎ፤ ዬካ ፖይይዳ ቦያና ዋላ ማኣቲ ሙይ ሙይ ዒ ናንጎንጎ።

16 ዒዛኮ ዓሱም ማሊፃ ላኣሚንቴም ዴንዲ ላንካይ ለዔ ሄላንዳኣና ቦም ማሊሣና ናንጎም።

17 ዬያ ጌሰቲ ዔቂሲ ቱኪ ዳኬሣ ያኦሲም ዲማጴ ከኢታንቸኬ፤ ዬይ ያዲ ማዕሣ ዴኤፖ ያኣዛሣ ሳይይዳ ዓኣ ካኣቶኮ ቢቲ ማዕሣ ቢያሣ ዔራንዳጉዲኬ፤ ዒዚ ዬያ ቢታንቶ ኮዔ ዓሲም ዒንጋኔ፤ ሂርኬ ማዒ ቦሂንቴዘንሣ ዒዚ ዔኪ ቢታንቶ ዓኣያ ማሂ ጌሣኔ።»

18 «ታኣኒ፡ ካኣቲ፡ ናብካዳናያኦሬ ዛጌ ዓውታ ያዲኬ፤ ዓካሪ ሂንዳ ኔኤኒ ቢልፃሶኦሬ! ታኣም ዬያኮ ቡሊፃ ኬኤዜ፤ ታኣኒ ካኣታዲ ዋይሣ ዓጮይዳ ዓኣ ዔር ዓሳ ዬያ ቡሊ ታኣም ኬኤዛኒ ዳንዳዑዋሴ፤ ኔኤኒ ጋዓንቴ ጌኤዠ ያኦዘኮ ዓያና ኔ ጊዳ ዓኣሣር ኔ ታኣም ኬኤዛኒ ዳንዳዓኔ።»

ዳኣኔኤሌ ካኣቲኮ ዓውቶ ቡሊሣ

19 ዒማና ቢልፃሶኦሬ ጌይንታ ዳኣኔኤሌ ኮሺ ዑሣ ዓኣጴ ዲቃቴሣር፡ ሃሣ ማሊ ሚርጌና ሜታጴሣር ዳካ ዋዴ ዚቲ ጌዔኔ፤ ዬያር ካኣቲ፡- «ቢልፃሶኦሬ! ዓውቶንታ ቡሊፃንታ ጌዔ ባኮ ዛሎር ሜታዲፖ» ጌዔኔ።

ቢልፃሶኦሬያ ካኣቲ ኮይላ፡- «ካኣቲዮ! ዓውቶንታ ቡሊፃንታ ኔኤም ማዒፃ ዓታዛ ኔኤኮ ሞርኮም ሞርኮም ማዒባኣቴ ታኣም ኮሺታያኬ።

20 ያዲኩ፡- ቶኦካ ዳንዲ ጫሪንጮ ሄሌያ፤ ሃሣ ዓጮ ቢያይዳ ዓኣ ዓሳ ጉቤ ዴንቃንዳ ፔቴ ዴኤፒ ሚሢ ኔኤኒ ያኦሲ ኔኤም ፔጋሲ ዳዋም ዛጌ፤

21 ዬያ ሚፃሣኪ ዒላዡ ዋዳ ሚርጌና ሚዛጳያኬ፤ ጉቤ ዴር ሙኡዛኒ ዳንዳዓ ሚርጌ ዓኣፒ ዒዛኮ ዓኣኔ፤ ካዮ ቦዓ ዒዛ ሺቦ ዴማ ናንጎንዶ ቤሲ ዴንቁም፡ ካፓኣ ዒዛኮ ካኣፖይዳ ማኣሪ ማዢ ናንጋ፤።

22 «ካኣቲዮ! ያደሲ፤ ሃሣ ደዲ ማዔ ዬይ ሚፃሣኪ ኔናኬ፤ ኔኤኮ ዴኤፑማ ጫሪንጮ ሄላንዳኣና ዴጊ ጴዴ፤ ኔኤኮ ቢታንታኣ ዓጮ ጉቤይዳ ጴዳያ ማዒ ዴዔ፤።

23 ካኣቲዮ! ኔኤኒ ዬያ ዛጋንቴ ያኦሲም ደማዳያ ማዔ ፔቴ ከኢታንኞ ጫሪንጫፓ ኩዲ፡- <ሚፃሣኪ ቲቂ ባይዙዋቴ፤ ቲቂንቴ ዴንጮ ጋዓንቴ ዓንጊና ሞኦና ዓንጊናፓ ኮሸና ካኒ ቢራታና ዓጮ ሸርሺ ቱካዖ ሳዓ ዒኢካ ሃሹዋቴ፤ ዬካፓ ዒፖይዳ ዓኣ ማኣቶ ባኣካ ዴዖንጎ፤ ጫሪንጮ ያልካሢ ዒዛይዳ ያዲ ዑያ ዒዛኮ ዋዒሶንጎ፤ ዴንዲ ላንካይ ለዔ ሄላንዳኣና ካዮ ቦዖና ዋላ ዒ ናንጎንጎ። ጌዔ፤።

24 «ካኣቲዮ! ዋይዜ፡ ቡሊፃ ያዲኩ፤ ዴኤፖ ያኦዛሢ ኔና፡ ታ ጎዳሢ፡ ካኣቲዳ ማዲንታንዳጉዲ ማሊ ቱኬ ባካ ሃካፓ ዴማ ኬኤዚንታ ጎይያ ማዓንዳኔ፡-

25 ዴር ባኣካፓ ዳውሲንቲ ደማዲ ኔ ዴንዳንዳ፤ ኔኤኮ ናንጋ ካዮ ቦዖና ዋላ ማዓንዳ፤ ላንካይ ለዔ ዓኣዳንዳያ ሄላንዳኣና ጌማይጉዲ ማኣቲ ኔ ሄንቃንዳ፤ ጫሪንጮ ያልካ ኔ ጊዳ ያዳንዳ፤ ዬይ ቢያ ማዲንታንዳሢ ዴኤፖ ያኦዛሢ ካኣቶ ቢያኮ ቢቲ ማዔሢና ዒ ኮዔ ዓሲም ካኣቲሞ ቢያ ዒንጋሢ ኔ ዔራንዳኣና።።

26 ዬይ ጨኢሮና ዴንጫ ሳዓ፡ ዒኢካ ዓታንዳጉዲ ዓይሢንቴሢ ያኦሲኮ ዓጮ ቢያሢዳ ቢታንቶ ዓኣሢ ኔ ዔሬሰካፓ ላሚ ጊንሢ ኔ ካኣታዳንዳያ ማዒ ዳዋያኬ፤

27 ዬያር ካኣቲዮ! ታ ዛሎና ታ ኔኤም ዞራ ዞር ዋይዜ፤ ጎሜ ማዲሢ ሃሺ ኮሺ ማዶ ቢያ ዋዴ ማዳ፤ ፑርቱሞ ሃሺጋፓ ሄርቁንቴ ዋርቃ ዓሶም ሚጨንቲ ኮሺ ባኣዚ ማዳ፤ ኔ ዬያይዴቴ ኮሹሞና ኔ ናንጋንዳ ለዓ ኔኤኮ ያደቃንዳኣ ናንዳ፤» ጌዔ፤።

28 ዬይ ባካ ቢያ ካኣቲ፡ ናብካዳናያኦሬ ሄሌ።።

29 ታጳ ላምዖ ዓጊኒኮ ጊንፃ ካኣቲ ባብሎኔይዳ ዓኣ ፔኤኮ ካኣቲሞ ማኣሮኮ ዴጌ ቤዛ ሃንቲቤቃ፡

30 ሂዚ ጌዔ፡- «ሃኖ ዴኤፖ ባብሎኔ ካታሜሎ ካኣታ ዒኢካ ናንጋንዳጉዲ፤ ሃሣ ዓጨሎኮዋ ዴኤፖ ካታሞ ዒዛ ማዔም

ታኣኮ ቦንቸና ጳጌቸሞና ፔጋዲ ዔርታንዳጉዲ ታ ቢታንቶና ታ ማዠሰቤያቱዋኣዓዳ?»

31 ዬያ ጌዒ ዒ ጌሰቲ ሃጊ ጋፑዋንቴ ሂዚ ጋዓ ዑኡሲ ጫሪንጫፓ ሙኩኔ፡- «ካኣቲዮ፡ ናብካዳናፆኦሬ! ኔ ጊዳ ጌሰቲ ቱኮና ሃይሶ ዋይዜ! ካኣቲማ ኔ ጊዳፓ ዔውቱኔ፤

32 ኔኤኒ ዴሮ ባኣካፓ ዳውሲንቲ ኬሰኪ ካዮ ቦዖና ዋላ ናንጋንዳኔ፤ ለንካይ ለዔ ዓኣዳንዳያ ሄለንዳኣና ጌማይጉዲ ማኣቲ ኔ ሄንቃንዳኔ፤ ዬይ ያዲ ማዓንዳሢ ጳኣፊ ጸኣዛሢ ሳዖ ካኣቶ ቢያሢኮ ቢቲ ማዔሢና ካኣቱሞዋ ቢያ ዒ ኮዔ ዓሲሞ ዒንጋሢ ኔ ዔራንዳኣናኩ።»

33 ዬይ ጌይንቴ ባካ ኔጉሞዖ ናብካዳናፆኦሬይዳ ማዲንቴኔ፤ ዬያሮ ዒ ዴሮ ባኣካፓ ዳውሲንቲ ኬሰኪኔ፤ ጌማይጉዲ ማኣቲያ ሄንቁኔ፤ ጫሪንጫፓ ኩዳ ዖልኮናኣ ዑፃ ዒዛኮ ዋዔኔ፤ ዒዛኮ ዑፆ ጋፓና ዚኣጊሎ ሶሌጉዲ ዑጌኔ፤ ፀንጋኣ ሃሞፑሮ ፀንጋ ማዒ ዴዔኔ።

ናብካዳናፆኦሬ ፆኦሲ ጋላቲ ጋላታ

34 ዬይ ዋዳ ዓኣዳሰካፓ ካኣቲ ናብካዳናፆኦሬ ሂዚ ጌዔኔ፡- «ለንካዎ ሌዓ ኩዳዛ ሌካ ጴግ ጌይ ታኣኒ ጫሪንጫፓ ዛጌኔ፤ ዒናኣ ታኣኮ ጊንሣ ዓሲ ዒኔ ማዔኔ፤ ጳኣፊ ጸኣዛሢ ታ ጋላቲኔ፤ ናንጊና ናንጋ ጸኣዛሢሞ ቦንቸና ሄርሺሢና ታ ሺኣሺኔ፤

ዒዛኮ ካኣቲማ ናንጊና ናንጋያኩ፤
ዒዛ ካኣቲሞኮ ጋፒንሢ ሳዖይ ባኣያኩ፤

35 ሳዖይዳ ናንጋ ዴራ ቢያ
ዒዛ ኮይላ ዔኤቢ ፓሡዋ ባኣዚኩ፤

ጫሪንጫፓ ከኢታንቸይዳኣ ማዖም
ሳዖይዳ ናንጋ ዴሮይዳ ዒ ኮዔ ባኣዚ ማዳያኩ፤

ዒ ማዳኒ ማሌ ባኮ ላኣጋኒ ዳንዳዓያና
ኔ ዓይኅ ማዲ ማዲ ዓኣይ? ጋዓንዳ ዓሲ ፔቲታዖ ባኣሴ።»

36 «ታኣኮ ዒና ዓሲ ዒኔ ማዔሰካፓ ኔጉሞዖ ታ ካኣቲሞ ቦንቸንታ ጳጌቸሞንታ ማዒ ጊንሣ ታኣም ዒንጊንቴኔ፤ ታና ዘራ ዓሶና ታኣኒ ዒንጌ ቢታንታ ዓኣ ዓሳኣ ዋዛና ታና ዔኬኔ፤ ዋንዳሰካፓ ባሼ ታኣኒ ቦንቸንቲ ካኣቲሞናኣ ዴዲ ዴዔኔ።

37 «ሃይሾ፤ ታኣኒ ናብካዳናፆኦሬ ጫሪንጫፓ ካኣታሢ ጋላቲ፡ ቦንቸ፡ ጳኣፊ፡ ጳኣፊ፡ ጳኣፊ፡ ዒዛ ዴኢ፡ ጳኣፊ፡ ዒዛ ማዳ ባካ ቢያ ፒዜኩ፤ ዒዛኮ ሳይፃኣ ጂሎ ሳይሢኩ፤ ፆቶሮሙሞና ሃንታ ዓሶ ቢያ ዒ ቦርሲሳኒ ዳንዳዓያኩ።»

5

ካአቲ ቢልፃሶኦሬ ገአጊሹ ሙዖ

1 ፔቴ ኬሊ ካአቲ ቢልፃሶኦሬ ቢታንቶ ዒዚ ዒንጌ ሚርጌ ሺያና ፓይዲንታ ዓሶም ዴኤፒ ሙኡዚ ገአጊሹኔ፤ ዒዚ ዬያ ዓሶና ዎላ ዎይኖ ዑዡ ዑሽከቤቃ።

2 ዴንዲ ማሣኒ ዑካዛ ዒዛኮ ዓዴ፣ ናብካዳናፃኦሬ ዬሩሳላሜ ጌኤዡ ማኣራፓ ዔኪ ሙኬ ዎርቆና ቢሮ ዓንጎናፓ ኮሾና ዑዡ ዑሽኮ ዓንጎ ዔኪ ዬዓንዳጉዲ ማዳ ዓሶ ዓይሄኔ፤ ካአቲ ዬያ ማዳህ ቢታንታ ዓኣ ዓሶንታ ዒዛኮ ላኣሎንታ ጊንፃኣ ማቸንሣንታ ዬያ ዓንጎና ዑሽካንዳጉዲኡ።

3 ማዳ ዓሳ ዒማና ዬያ፣ ዬሩሳላሜይዳ ፆኦሲኮ ጌኤዡ ማኣራፓ ዔኪ ሙከንጉቴ ዎርቆና ቢሮ ዓንጎናፓ ኮሾና ዑዡ ዓንጎ ኔጉዎፃ ባዔኔ፤ ዬያሮ ካአቲ፣ ቢታንታ ዓኣ ዴኤፖ ዓሳ፣ ዒዛኮ ላኣሎንታ ጊንፃኣ ማቸንሣንታ ዬያ ዓንጎና ዎይኖ ዑዡ ዑሽከኔ።

4 ዔያታ ዑሽከፆይዳ ዓኣፆ ዎርቁ፣ ቢራ ዓንጊ፣ ሞኦና ዓንጊንታ ሜሌ ዓንጊ፣ ሚሣንታ ሹቹንታይዳፓ ኮሾና ፆኦዚ ፔኤኮ ጋላቲኔ።

5 ዬያይዳ ጎይሣ ዓኣንጉ ዓሲ ኩቺ ማላ ኩቺ ጌኤዡ ማኣሮይዳ ዓኣ ሻርኖኮ ሆታ ሲልጊዲ ገአጊሹና ካአቲሞ ማኣሮ ኮጮይዳ ዔርቲባኣንጉቴ ፆኣፒሣ ዓርቁኔ፤ ዬያ ፆኣፓሣ ካአቲ ዴንቁኔ።

6 ዓማና ኔጉዎፃ ዒዛኮ ዓኣፖ ካራ ቦኦሬኔ፤ ዲቃቲፆይዳፓ ዔቁያና ዑፆኣ ጎጋይቁኔ፤ ዎልቃ ጌሌም ጨገጮኣ ቢያ ዒዛኮ ላቤኔ።

7 ዬያሮ ማርሻ ማርሻ ዓሶንታ ዡዎንታ ዡኦጋሣ ዛጋ ዔሮ ዓሶንታ ዓሳ ዔኪ ጌልዛንዳጉዲ ዒዚ ዒላቲ ኬኤዜኔ፤ ዬይ ዓሳ ዔኤሊንጉቴ ሙካዛ ዒዚ፡- «ሃያ ፆኣፒንጉቴ ባኮ ናባቢ ዎዚ ጋዓቲያ ታኣም ቡሊ ኬኤዜ ዓሣ ጮልዔ ሚዛጶ ማኣዓሣ ማይንታንዳኔ፤ ዎርቆ ቁንታሣያ ሆላ ታ ዒዛ ማይሳንዳኔ፤ ሃሣ ጊንሣ ታኣኒ ካአታዲ ዎይሣ ዓጮይዳ ሃይሣሳ ቤዛ ዴዒ ቢታንቶና ዓጮ ዎይሣንዳኔ» ጌዔኔ።

8 ዬና ዔሮ ዓሳ ካአቲ ቤርቶ ሺኢኬኔ፤ ጋዓንጉቴ ዬያ ፆኣፒንጉቴ ባኮ ናባባኒና ቡሊ ኬኤዛኒ ዳንዳዔ ዓሲ ፔቴታፆ ጶዲባኣሴ።

9 ዬያሮ ካአቲ ቢልፃሶኦሬ ዑሣ ዓኣዴ ማሊ ሜታዴም ዓኣፖ ካራ ዒዛኮ ሃቺም ቦኦሪ ቦኦሪ ዓኣዴኔ፤ ቢታንታ ዓኣ ዴኤፖ ዓሶም ዎኦቶንዳ ጎይሣ ሳይቁኔ።

10 ቤርታ ጌኤሻ ማዒ ዓኣ፣ ዒዛኮ ዒንዳ ካአቲንታ ቢታንታ ዓኣ ዓሶንታ ጋዓ ባኮ ዎይዚ ሙዖ ሙዎ ኬኤፆ ጌላዮ፡- «ካአቲዮ! ናንጊና ካአታዲ ናንጌ! ሃያ ባኮሮ ሃያይዲ ማሊ ዓኣፖ ካሮዎ ኔ ቦኦሪሳንዳያ ኮይሱዎሴ፤

11 ጌኤዠ ያኦዘኮ ዓያና ዓኣያ፡ ፔቴ ዓሲ ኔኤኒ ካኣታዲ ዋይሣ ዓጫ ዓኣኔ፤ ዬይ ዓሢ ኔ ዓዴ ካኣታዲ ዓኣ ዋደና ያኦዘጉዲ ዔራቶና ማሊ ጰቂሥሢያ ኩሜያ ማዒ ጴዴኔ፤ ዬያሮ ኔኤኮ ዓዴ፡ ናብካዳናፆኦሬ ዠዎኮ፡ ማርሾ ማርሻ ዓሶኮ፡ ዔሮ ዓሶንታ ዠኦጋሣ ዛጋ ዔሮ ዓሶንታኮ ቢያ ሱኡጌ ማሂ ዒዛ ደኦሬኔ።

12 ዒዚ ዓውቲ ቡሊሢና፡ ዓኣቲንቴ ባኣዚ ፔጋሲ ኬኤዚሢሢና ዲማ ዔራቶ ዓኣያ ጨንጮ፤ ሃሣ ዔሮ ዓሲኬ። ዬያሮ ኔ ዓዴ ናብካዳናፆኦሬ <ቢልፃሶኦሬ> ጌይ ሱንፆ ጌሢ፡ ዳኣኔኤሌ ዔኤሊሴ፤ ዒዚ ሃያ ቢያ ቡሊ ኔኤም ኬኤዛንዳኔ» ጌዔኔ።

ዳኣኔኤሌ ፃኣፖና ባኮኮ ዓኣቲንቴ ማሊፆ ቡሊ ኬኤዜሢ

13 ዬካፓ ዳኣኔኤሌ ካኣቲ ቤርቶ ሺኢካዛ፡ ካኣቲ፡ «ታ ዓዴ፡ ካኣቲ፡ ናብካዳናፆኦሬ ዲዒ ዔኪ ሙኬ ዪሁዳ ዓጮ ዓሶ ባኣካፓ ፔቴ ዳኣኔኤሌ ጎፆሢ ኔናዳ?

14 ጌኤዠ ያኦዘኮ ዓያና ኔ ጊዳ ዓኣሢና ጨንጮምንታ ዔራቶንታ ኔኤም ዒንጊንቴሢ ታ ዋይዜኔ።

15 ታ ቤርቶ ታና ዘራ ዔሮ ዓሶንታ ማርሾ ማርሻ ዓሶንታ ቢያ ፃኣፒንቴ ባኬሎ ናባቢ ቡላንዳጉዲ ዔኤሊንቴ ሺኢኬኔ፤ ጋዓንቴ ዔያታ ታኣም ቡሊ ኬኤዛኒ ዳንዳዒባኣሴ።

16 ኔኤኮ ዓኣቲንቴ ባኣዚና ሜታሳፆ ማዔ ባኣዚ ቢያ ቡሊ ዔራ ዔራቶ ዓኣሢ ታ ዋይዜኔ፤ ዬያሮ ሃኖ ፃኣፒንቴ ባኬሎ ናባቢ ቡሊፆዎ ታኣም ኔ ኬኤዜቴ ጮልዔ ሚዛጰ ማኣዓሢ ታ ኔና ማይሳንዳኔ፤ ዎርቂ ቂንቴያኣ ሆላ ታ ኔኤኮ ማይሲ ታኣኒ ካኣታዲ ዋይሣ ዓጮይዳ ሃይሣሳ ቤዛ ዴዒ ኔ ዋይሣዳንጉዲ ደኦራንዳኔ» ጌዔኔ።

17 ዳኣኔኤሌ ማሃያ፡ «ካኣቲዮ! ኔ ዒንጋኒ ጋዓ ባካ ኔኤም ማፆንጎ፤ ኔ ቦንቺ ዒንጋ ባኮዎ ሜሌ ዓሲም ዒንጌ፤ ጋዓንቴ ታ ኔኤም ሃያ ፃኣፖና ባኮ ናባቢ ቡሊፆዎ ኬኤዛንዳኔ፤

18 «ካኣቲዮ! ዴኤፖ ያኦዘኮ ኔ ዓዶ ናብካዳናፆኦሬም ካኣቲሞና ዴኤፑሞና ቦንቺዎ ዒንጌኔ፤

19 ዒዛኮ ዴኤፑማፓ ዔቂያና ዲማ ዲማ ዓጮይዳ ናንጋ ዓሶና ዲማ ዲማ ዳንጎ ጌሰታ ፃጶና ቢያ ዒዛ ቤርቶይዳ ዒጊቹሞና ጎጋይቂ ዒዛም ዎርቂኔ፤ ዒዚ ኮዔ ዓሲ ዎዳኒና ዳቂሻኒ፤ ሃሣ ዒ ኮዔ ዓሲ ሱኡጌ ማሂ ደኦራኒና ሱኡጋታፓ ኬይሳኒ ዳንዳዔኔ።

20 ጋዓንቴ ዒዚ ፆቶርቃያ፡ ዋይዚ ዒፃያ፡ ሃሣ ፑርታ ዓሲ ማዒ ጴዴሢሮ ዬይ ቦንቻ ዒዛ ዑፃፓ ጉሲንቴም ካኣቲሞ ፆይታፓ ዒ ኬዴኔ፤

21 ዴሮ ባኣካፓኣ ዒ ዳውሲንቴኔ፤ ዒዛኮ ዒና ዓሱሞፓ ላኣሚንቴ ቦፆሮ ማዔኔ፤ ዬያሮ ዒዚ ናሽኪባኣፆ ማኣቲ ሄንቂ ሄንቂ ኪርሞሌና

ዋላ ናንጌኔ፤ ዒዚ ዋርቆ ኬኤሲ ባይዘም ዑዖ ዒዛኮ ጫሪንጮ ያልካሢ ዋሲኔ፤ ዩይ ያዲ ማዔሢ ዴኤፖ ያኦዛሢ ካኣቶ ቢያኮ ዑፃ ቢቲ ማዔሢና ካኣቱዋ ቢታንቶ ቢያ ዔኪ ኮዔ ዓሲም ዒንጋኒ ዳንዳዓያታሢ ዔራንዳኣናኬ።

22 «ኔኤኒያ ቢልፃሶኦሬ ሃሢ ኔ ዒዛ ናይ ማዒያና ዩያ ቢያ ዔራያታዖ ኔ ቶኦኮ ሂርኪዲ ሹሌዓኒ ዳንዳዒባኣሴ።

23 ኔኤኒ ዩያይዲዋዖ ጫሪንጮ ጎዳሢም ዖቶርቂ ኔና ኔ ዴግ ዴገዴኔ፤ ሃሃ ጌኤኮ ማኣራፓ ቡሪ ዔኪ ሙኮና ዋርቆና ኮሻና ማሆ ዔኪ ሙኤሲ ኔናጎታ ኔኤኒ ቢታንቶ ዒንጌ ዓሶንታ ኔኤኮ ላኣሎንታ ጊንፃኣ ማቸንሢታ ዋላ ዋይኖ ዑኩ ዑሽኬኔ፤ ዒንሢ ዑሽኬሰካፓ ዛጋኒና ዋይዛኒ ዳንዳዑዋያ፤ ሃሃ ፔቲ ባኣዚታዎ ዔራዋ ዋርቆና፤ ቢሮ ዓንጎና፤ ሞኣኖ ዓንጎና ማሌ ዓንጎና፤ ማሢና ሹቸና ገኢጊሽ ኮሻና ያኣዘ ዒንሢ ጋላቲኔ፤ ዋዲኒና ዲቁሻኒ ዳንዳዓያ፤ ሃሃ ኔ ናንጋ ናንጎ ቢያ ኔኤኮ ፓይዲ ኔና ዋይሃ ናንገና ናንጋ ጎዳሢ ጋዓንቴ ኔኤኒ ቦንቸባኣሴ።

24 ያኦሲ ዓሲ ኩቸ ዳኪ ሃያ ባኮ ፃኣፒሴሢ ዩያሮኬ።

25 «ፃኣፒንቴ ባኬላ፡- ማኔ! ማኔ! ቲቁል! ፓሪሴ። ጋዓያኬ።

26 ዩናኮ ቡሊፃ ያዲኬ፤ ማኔ ጌይፃ፡- «ኔኤኒ ካኣታዲ ዴዓንዳ ዋዶ ኔኤኮ ያኦሲ ፓይዲ ዛገ ጋፒንሢ ማዓንዳጉዲ ማሄኔ» ጌይሢኬ።

27 «ቲቁል ጌይፃ፡- «ዴኤሡዋ ዔሮ ባኮና ዛጎዛ ኔኤኒ ሹሌዒ ጴዴኔ» ጌይሢኬ፤

28 «ፓሪሴ ጌይፃ፡- «ኔ ካኣታዲ ዋይሃ ዓጫ ፓቂንቲ ዛላ ማዶኔ ዓሶም፤ ዛላ ጊንሢ ፓሪሴ ዓሶም ዒንጊንቴኔ» ጌይሢኬ።»

29 ቢልፃሶኦሬ ዩካፓ ኔጉዋዖ ቦንቸንታያ ማዔ ዴኤፖ ያዶዘ ማኣዓሢ ዓሳ ዳኣኔኤሌ ማይሳንዳጉዲ፤ ማይንቶ ዋርቆዋ ሆላ ማይሳንዳጉዲ፤ ሃሃ ዒ ካኣታዲ ዋይሃ ዓጮኮ ቢታንቶና ሃይሣሶ ቤዛ ማዒ ዋይሃንዳጉዲ ማሂ ጌሢኔ።

30 ዩማ ዋንቶ ዓሲ ባብሎኔ ካኣቲ ቢልፃሶኦሬ ዋዴኔ፤

31 ዒማና ላሂታሚ ላምዖ ሌዔ ማዔያ፤ ማዶኔ ዓጪ ዓሲ፤ ዳኣሪዮሴ ጎዖሰኬይ ዒዛ ካኣቱዋ ዔኪ ቤዛ ካኣታዴኔ።

6

ዳኣኔኤሌ ዘቦ ዔታ ኬኤሪንቴሢ

1 ዳኣሪዮሴ ዒዚ ካኣታዲ ዋይሃ ዓጮ ቢያ ዋይሃንዳጉዲ ፃኤታና ላማታሚ ማዓ ሱኡጌ ደኦራኒ ኮዔኔ።

5:29 ማኸ. ማፃ 41:42።

2 ሃሣ ጊንሣ ዬያቶ ዓሶ ቢታንቶና ዛጊ ዋይሣንዳጉዲ ዳኣኔኤሌንታ ማሌ ላምፆ ዓሲያኣ ዒ ደኦሬኔ።

3 ዒማና ዳኣኔኤሌኮ ማዶ ማዳኒ ዓኣ ዔራታ ዒዛና ዋላ ዬኖ ዓጮ ዋይሣ ዓሶንታ ቢታንታ ዓኣ ዓሶንታፓ ቢያ ባሼ ማዔሣ ዳኣኔኤሌ ማዶና ፔጋሲ ዳዌኔ፤ ዬያሮ ካኣቲ ካኣታዲ ዋይሣ ዓጮይዳ ቢያ ቢታንቶ ዓኣ ሱኡጌ ማሂ ዳኣኔኤሌ ደኦራኒ ማሌኔ።

4 ዬካፓ ዒዛና ዋላ ዓጮ ዋይሣ ማሌ ዓሶንታ ቢታንታ ዓኣ ዓሶንታ ዳኣኔኤሌ ዬኖ ዓጮይዳ ዒንጊንቴ ቢታንቶና ማዳ ባኮይዳ ዳቢንቲ ዴንቁ ዋጌና ዒዛ ዓይሣሳኒ ኮዔኔ፤ ጋዓንቴ ዳኣኔኤሌ ፔና ኮሺ ካፓያ፡ ሃሣ ጉሙርቁንታ ዓሲ ማዔሣሮ ፔቲታፆ ዳቢንቲ ዔያታ ዒዛይዳ ዴንቃኒ ዳንዳዒባኣሴ።

5 ዬያሮ ዔያታ ዋላ፡- «ዒዚ ካኣሸካ ፆኣዛሣ ዛሎና ማዒባኣቲ ዋጌና ኑ ዳኣኔኤሌ ዓይሣሳንዳ ዳቢንቲ ኑ ዴንቃኒ ዳንዳዒባኣሴ» ጌይ ዘርቲኔ።

6 ዬካፓ ዓጮ ዋይሣ ዓሶና ቢታንታ ዓኣ ዓሶና ዋላ ጌኔ ጌኤሲ ጌሰቲቱኪ ካኣቲ ኮይላ ሙካፆ፡- «ካኣቲዮ፡ ዳኣሪዮሴ! ኔኔኒ ናንጊና ካኣታዲ ናንጌ!

7 ኑኡኒ ኔ ካኣታዲ ዋይሣ ዓጮይዳ ዓሶ ዋይሣፆ ማዶ ማዳ ዴኤፖ ዓሳ፡ ዋጎ ኮሺ ዔራ ዓሳ፡ ሱኡጋ፡ ኔና ዘራ ደንዘንታ ቢታንታ ዓኣ ዓሳ ኑ ዋላ ፔቲ ጌሰቲ ሙኩ ባኣዚ ዓኣኔ፤ ዬና ዓይሳዳይ ጌዔቲ ሃይማፓ ዓርቃፆ ዴንዲ ሃይሣታሚ ኬሊ ሃላንዳኣና ኔናቱዋንቴ ማሌ ዓይሳ ፆኣዘታቲያ ዓሲ ሺኢቁ ካኣሸኩዋጉዲ ኪኢታ ኔ ኬሲ ዳካንዳጉዲኬ፤ ዬያ ዓይሣፆ ኪኢቶ ዋይዚ ዒፃ ዓሲ ጴዴቶ ዘሶ ዔታ ዓጊንታንዳጉዲ ዓይሣ።

8 ዋይዜ ካኣቲዮ! ዬይ ዓይሣፆ ኪኢታ ሜዶኔና ፓሪሴና ዋጎጉዲ ደዲ፤ ሃሣ ላኣሚንቱዋያ ማዓንዳጉዲ ኔ ዓይሣያ ማዔሣ ዔርዘ ማላቶ ጊዳ ዓይሣ» ጌዔኔ።

9 ዬያሮ ካኣቲ ዳኣሪዮሴ ዬያ ዓይሣፆ ኪኢቶ ዒ ጌዔያ ማዒፆ ዔርዘ ማላቶ ጊዳ ዓይሣ ደዲ ማሂ ኬሴኔ።

10 ዳኣኔኤሌ ዒማና ዬይ ዓይሣፆ ኪኢታ ካኣቲ ፔ ጌዔያ ማዔሣ ዔርዘ ማላቶና ፃኣፒንቲ ኬሰከሣ ዔራፆ ዒዚ ናንጋ ኩሶ ኬኤፆ ኬሰከኔ፤ ዒዚ ናንጋ ኩሶ ኬኤፆ ዬሩሳላሜ ካታዋኮ ሆታ ኬኤፆኮ ፑልቶ ካራ ቡሎዛ ጴጴዳያታንቴ ዒዚ ቤርታኣፓ ማዳ ጎይፆ ጉኡዞና ሳዓ ጉሞዓቲ ፔኤኮ ፆኣዛሣ ጋላቲ ጋላቲ ፔቲ ኬሊ ዳ ሃይሣ ማይንቴ ሺኢቃ ሺኢጲፆ ሺኢቁኔ።

11 ዬያታ ጌኖ ማሊፆ ጌሰቲ ዓሳ ዋሊ ዑፃ ሃሣ ዴንዲ ዳኣኔኤሌ ፔኤኮ ፔና ማዜፆ ፆኣዛሣ ሺኢቃንቴ ዴንቁኔ።

12 ዩካፓ ዔያታ ፔቲይዳ ካኣቲ ኮይላ ዴንዲ ዓይሢያ ከኢቶ ኬሶናሢ ዳኣኔኤሌ ካፒባኣያ ማዒያ ሂዚ ገይ ኬኤሴኔ፡- «ካኣቲዮ፤ ዴንዲ ሃይሢታሚ ኬሊ ሃላንዳኣና ኔናቱዋንቴ ሜሌ ዓይጎ ስኦዞዎ ማም ዓሲ ሺኢቂ ካኣሽካ ዓሲ ዘቦ ዔታ ዓገንታንዳጉዲ ዓይሥሢ ከኢታ ኔ ገዔያ ማዒያ ዔርዘ ማላቶና ዓይሢ ኔ ኬሲባኣዓዳ?»

ካኣቲ ዒማና፡- «ሂዮ፤ ሜዶኔና ፓሪሴና ዋጎጉዲ ዶዲ፣ ሃሣ ላኣሚንቴዎ ዓይሥሢ ከኢታ ታ ኬሴኔ» ገዔኔ።

13 ዬያር ዔያታ፡- «ሂዳዎ ሃሢ ካኣቲዮ! ዲዒ ዔኪ ሙኮና ዪሁዳ ዓሶ ባኣካፓ ፔቲሢ ማዔ፣ ዳኣኔኤሌ ኔና ቦንቹዋሴ፤ ኔኤኒ ማላቶ ገዳ ዓይሢ ኬሴ ዓይሢያ ከኢቶ ካፖ ዒዲ፣ ፔቲ ኬሊዳ ሃይሢማይንቴ ፔ ስኦዞሢ ሃይሾ ዒ ሺኢቃንቴዎ» ገዔኔ።

14 ካኣቲ ዬያ ዋይዞዎ ሚርገና ሶዬኔ፤ ዩካፓ ዳኣኔኤሌ ዓውሳኒ ማሌኔ፤ ዴንዲ ዓባ ገላንዲያ ሃላንዳኣና ዒዛ ዓውሶንዶ ካራ ሚርገ ኮዔኔ።

15 ሃሣ ዬና ዓሳ ካኣቲ ኮይላ ፔቲሞና ሙኪ፡- «ካኣቲዮ! ሜዶኔና ፓሪሴ ዋጎ ጎይዖና ፔቲ ካኣቲ ኬሴ ዓይሥሢ ከኢታኣ ማም ሜሌ ከኢታ ላኣሚንታኒ ዳንዳዑዋኣሢ ዔሬ!» ገዔኔ።

16 ዬያር ዳኣኔኤሌ ዓርቂንቴ ዘቦ ዔታ ዓገንታንዳጉዲ ካኣቲ ዓይሢኔ፤ ዒማና ዒዚ ዳኣኔኤሌ ኮይላ፡- «ቢያ ዎዴ ኔ ጉሙርቂንቴ ዒዛም ማዳ ስኦዞሢ፣ ዒ ኔና ዓውሶንጎ» ገዔኔ።

17 ዩካፓ ዬይ ዔቶ ካራ ዴኤፒ ሹቸና ዎዲንቴኔ፤ ዓይጎ ዓሲያኣ ማም ዳኣኔኤሌ ዬይፓ ኬሴ ዓውሳኒ ዳንዳዑዋጉዲ ካኣቲ ዒዚ ዎይሣ ዓጮይዳ ዒ ገዔያ ማዒያ ዔርዘ ማላቶና፤ ሃሣ ዒዛኮ ዶንዛ ገዔያ ማዒያ ዔርዘ ማላቶዎ ገዳ ዓይሢኔ።

18 ዬያይዳዎ ካኣቲ ፔኤኮ ካኣቲሞ ማኣሪ ማዒ ዴንዴኔ፤ ዒማና ዒ ሙኡዚያ ሙይባኣሴ፤ ዒዛ ዎዛሳንዳ ባኣዚ ዓሳ ዒዛም ሺኢሹዋጉዲ ላኣገ ገንዎ ዓቲ ዬኖ ዋንቶ ዎርቂኔ።

19 ዩካፓ ሃገ ሳዓኮ ዲገቹ ዘዞቃኣና ካኣቲ ገንዓሰካፓ ዔቂ ኔጉዋዎ ዘቦ ዔቶ ካር ዓኣዳኔ።

20 ዒዚ ዒኢካ ሃላዎ ሶዬ ዑኡሲና፡- «ናንገና ናንጋ ስኦዞሢ ማዳሃ፡ ዳኣኔኤሌ! ቢያ ዎዴ ጉሙርቂንቴ ኔኤኒ ማዳ ስኦዞሢ ዘቦይዳፓ ኔና ዓውሳኒ ዳንዳዒያ?» ገይ ዔኤሊንቴኔ።

21 ዳኣኔኤሌ ማሃዎ፡- «ካኣቲዮ! ናንገና ካኣታዲ ናንገ!»

22 ዘባ ታና ዔኤቢ ዎኦቱዋጉዲ ስኦሲ ፔኤኮ ከኢታንቻሢ ዳኪ ዳንጎ ዘቦኮ ዓርቂኔ፤ ዬያ ዒ ማዳሢ ታኣኒ ዒዛ ቤርታ ገኤሽ ማዒሢርና ኔኤማኣ ታኣኒ ፑርታ ባኣዚ ማዲባኣሢ ዔሬሢርኬ» ገዔኔ።

23 ዬያሮ ካኣቲ ኮሺ ዋዛዳኔ፤ ዳኣኔኤሌያ ዓሳ ዘቦ ዔታፓ ኬሳንዳጉዲ ዓይሣኔ፤ ዒዚ ያኦሲ ጉሙርቁያታሣሮ ዓሳ ዒዛ ዘቦ ዔታፓ ኬሳኣና ፀ-ያይዳ ዒዛኮ ዘባ ፔቲታ? ዔኤቢ ዎኦቲባኣሣ ዓሳ ዛጊ ዔሬኔ።

24 ካኣቲ ዒማና ገንሣ ዳኣኔኤሌ ዎጎና ዓይሣሴ ዓሳ ዓርቁንቲ ዬዓንዳጉዲ ዓሲ ዳኤኔ፤ ዬያሮ ዔያታ ዓርቁንቲ ዔያቶኮ ላኣሎንታ ናኣቶንታ ዎላ ዘቦ ዔታ ዓገንቲኔ፤ ዔያታ ሃጊ ዘቦ ዔቶኮ ካሮ ዎዎኦካኣና ዘባ ዔያቶ ሾኦሊ ላኣሊ ሜጌያዎ ቢያ ሚንሣኔ።

25 ዬካፓ ካኣቲ ዳኣሪዮሴ ዓጮይዳ ዓጮይዳ ናንጋ ዴሮና ዲማ ዲማ ሙኡጮ ጌሰታ ፃጸናዎ ሂዚ ጋዓያ ፃኣፒ ኪኢታ ዳኤኔ፡-

«ዒንሣ ቢያሣ ዎዚ ኮሺዳ?»

26 ታ ዓጮይዳ ናንጋ ዴራ ቢያ ዳኣኔኤሌ ያኦዛሣ ዒገጫንዳጉዲና ቦንቺ ካኣሽካንዳጉዲ ታ ዓይሣኔ፤

«ዬይ ያኦዛሣ ሸምፔና ማዒ ናንገና ናንጋ ያኦሲኤ፤

ዒዛኮ ካኣቲማኣ ባይቁዎኣያኤ፤

ዒዛ ካኣቲዎኮ ጋፒንሣ ባኣያኤ፤

27 ዒዚ ዓውሳኔ፥ ፑርታ ባኣዚፓኣ ካፓኔ፤

ዒዚ ጫሪንጮና ሳያናይዳ ፔ ዎልቁና ማዲንታ ዓኪ ባኣዚ ማዲያኤ፤

ዒዚ፥ ዬይ ያኦዛሣ ዳኣኔኤሌ ዘቦ ዳንጋፓ ዓውሴኔ።»

28 ዬያሮ ዳኣኔኤሌ ካኣቲ ዳኣሪዮሴ ዎዶና፤ ሃሣ ገንሣ ፓሪሴ ካኣቲ ቁኢሮሴ ዎዶናኣ ቢያ ቦንቺንቲ ጎይሣ ናንጌኔ።

7

ዳኣኔኤሌም ያኦሲ ፔጋሲ ዳዌ ያይዶ ቦዖና ዬያኮዎ ቡሊያ (7:1—12:3)

1 ባብሎኔ ካኣቲ ቢልፃሶኦሬ ካኣታዳ ቤርታሳ ሌዖና ዳኣኔኤሌ ፔኤኮ ሻኣሎይዳ ላሂ ዓኣፃ ያኦሲ ፔጋሲ ዳዌ ባኣዚ፥ ሃሣ ዓውቲያ ዛጌኔ፤ ዬካፓ ዒ ዬያ ዛጌ ባኮ ፃኣፒኔ።

2 ዒዚ ሂዚ ጌዔኔ፡- «ታኣኒ ዳኣኔኤሌ ያይዶ ዛላፓ ዔቁ ዴኤፒ ጉዳ ባዞ ዎኣፃ ዓገሣንቲ ያኦሲ ዳዌም ፔቲ ዎንቲና ዛጌኔ።

3 ዒማና ያይዶ ዲማ ዲማ ዴኤፒ ቦዖ ባዛፓ ኬሰኤኔ።

4 ቤርታሳ ቦዓሣ ዘቢ ማላያኤ፤ ዒዛኮ ኮኦኤ ጋኣሲ ማላ ጋኣሲ ዓኣኔ፤ ዒማና ታ ዛጋ ጎይሣ ዓኣንቲ ዬይ ጋኣዛ ዒዛኮ ቱገንቲኔ፤ ዬይ

በዓሢ ጊንሣ ደግ ጌይ ዓሲጉዲ ላምፆ ቶኪና ዔቄኔ፤ ዓሲ ዒኔያ ዒዛም ዒንጊንቴኔ።

5 «ላምዓሳ በዓሢ ጊንፆ ቶኮ ሉኡቢ ዔቄ፣ ዲቤ ጌይንታ በዓሢ ማላያኬ፤ ዩይ ፔኤኮ ዓጮና ሃይሣ ባራንሢ ሜጌሢ ደይ ዓርቄ ዓኣኔ፤ ዒዛም፡- ራ ኮዔ ዓሸኪ ዚቲ ጋዓፆ ሙዔ።» ጋዓ ዑኡሲና ኬኤዚንቴኔ።

6 «ዬያ ታ ዛጋ ጎይሣ ዓኣንቴ ሜሌ ማኣኪ ማላ ቦፆ ኬሰኬኔ፤ ዒዛዞቀ ካፒ ጋኣሲ ማላ ያይዶ ጋኣሲ ዙሎይዳ ዓኣኔ፤ ሃሣ ያይዶ ቶኣኪያ ዓኣኔ፤ ዒዛም ዎይሥሢ ቢታንቶቀ ዒንጊንቴኔ።

7 «ዬካፓ ሃሣ ያይዳሳ ቦፆ ታ ዳንቄኔ፤ ዩይ በዓሢ ዒጊቻያ፣ ዲቃሣያ፤ ሃሣ ፑኡፒ ዶዲ ቦፆኬ፤ ዩያ በዓሢኮ ጫሃያና ደይ ሜንሣ ደኤፒ ደኤፒ ዓንጊ ዓቺ ዓኣኔ። ዓቲ ባኮ ዒ ፔኤኮ ቶኮና ሄርቃኔ፤ ሃንጎ ቦፆይፓፓ ቢያ ዲማ ታጾ ካኣሪ ዒዛኮ ዓኣኔ።

8 ታኣኒ ዩያ ካኣሮ ዛሎ ማላ ጎይሣ ዓኣንቴ ዩያ ካኣሮ ባኣካ ሜሌ ደካ ካኣሪ ኬሰኬኔ፤ ዩማ ካኣሮማም ቤዞ ሃሻኒ ዎንዴ ዓኣ ካኣራፓ ሃይሣ ካኣሪ ቱጊንቴኔ፤ ዩማ ደኮ ካኣሮማኮ ዓሲ ዓኣፒ ዓኣያ፣ ሃሣ ያቶርቄ ጌሰታ ዒንዲርሲያኣ ዓኣያኬ።

ናንጊና ሸምፔና ዓኣ ማዒ ናንጋሢ ዛሎ ፔጋሲ ደዎና ባኣዚ

9 «ታኣኒ ዩያ ዛጋ ጎይሣ ዓኣንቴ ካኣታ ደዓ ያይታ ጌሢንቴኔ፤ ዩይ ሚናንካፓ ዓኣሢ ዩያ ያይቶይዳ ዴዔኔ፤ ማኣዓሢ ዒዛኮ ሻቺጉዲ፣ ቶኣኮ ጋማኣ ፑኡታጉዲ ቦኣራያኬ፤ ዒዚ ዴዔ ካኣቶ ያይቶኮ ሸራ ቶካ ዔዔኤታ ታሚጉዲ ዜኤሊንሣያኬ።

10 ዒዚ ዴዔ ካኣቶ ያይቶኮ ቤርታፓ ታሚ ዓልቃኔ፤ ዒዛም ማዳ ሚርጌ ሸያና ፓይዲንታ ዓሲ ዓኣኔ፤ ጊንሣ ሃሣ ፓይዲፓ ዑሣ ዓኣዳ ዓሲያኣ ቤርታ ዒዛኮ ዔቄ ዓኣኔ፤ ዒማና ጌኤሲ ጌሰቲ ቲቃኒ ሃይሴ ዓርቄንቴኔ፤ ማፃኣፔያ ቡሊንቴኔ።

11 «ዩማ ያቶርሙሞና ጌሰታ ካኣሮማ ፖኣሊንቲ ጌሰታ ዑኡዞ ታ ዎይዘፆ ዒማ ዛጌኔ፤ ዒማና ታ ዛጋ ጎይሣ ዓኣንቴ ዩይ በዓሢ ዎዲንቲ ታሚዳ ዓጊንታዛ ታማ ዒዛ ሙይ ባይዜኔ።

12 ሜሌ ቦፆኮቀ ቢታንቴሞ ዎልቃ ዔውቴኔ፤ ጋዓንቴ ደካር ሸምፔና ዔያታ ናንጋንዳጉዲ ዔያቶ ሃሸናኔ።

7:6 ዮሃ. ያፔዳ 13:2። 7:7 ዮሃ. ያፔዳ 12:3፤ 13:1። 7:8 ዮሃ. ያፔዳ 13:5-6።
7:9 ዮሃ. ያፔዳ 20:4፤ 1:14። 7:10 ዮሃ. ያፔዳ 5:11፤ 20:12።

13 «ዬኖ ታና ያኦሲ ፔጋሲ ዳዌም ታ ዛጌ ዋንቴሎና ዓሲ ናዓሢ ማላ ዓሲ ሻኣሬ ዓጮ ማንጌም ሙካያ ታ ዛጌኔ፤ ዬያ ዔኪ ናንጊና ናንጋሢ ቤርቶ ሺኢሸና።

14 ዲማ ዲማ ዓጮይዳ ናንጋ ዳሮንታ ዲማ ዲማ ሙኡጮ ጌሰታ ፃጵንታ ዒዛም ማዳንዳጉዲ ቢታንቶ፣ ቦንቸንታ ካኣቱሞንታ ዒዛም ዒንጊንቴኔ፤ ዒ ካኣታዲ ዎይሣ ዓጮ ባይቁዎና ናንጊና ናንጋያኬ፤ ዒዛ ካኣቱሞኮ ጋፒንሢ ባኣያኬ።

ያኦሲ ፔጋሲ ዳዌ ባኮኮ ቡሊያ

15 «ታኣኒ ዳኣኤሌ ዬኖ ዛጌ ባኬሎ ዛሎ ማላ ኮሺ ማታዳ።
16 ዲያሮ ዒኢካ ዔቁ ዓኣዘንሢፓ ፔቴሢ ባንሢ ታኣኒ ደጪ ዬያ ቢያ ባኮኮ ጎኔ ቡሊያ ያኦጮኔ፤ ዒዚያ ታኣም ዬያ ቢያኮ ቡሊያ ኬኤዜ።

17 ዒ ታኣም ኬኤዘያ፡- ሃንሢ ያይዶ ዴኤፖ ዴኤፖ ቦያንሢ ሳያይዳ ካኣታዳንዳ ያይዶ ካኣቶኬ።

18 ጋዓንቴ ዴኤፖ ያኣዛሢም ዲማዴዘንሢ ዬያ ካኣቱሞ ዔኪ ናንጊና ዔያቶሮ ማሢ ዓይሳንዳኔ፤ ጌዔ።

19 «ዬካፓ ሃሣ ታኣኒ ማሌ ቦያይዳፓ ቢያ ዲማ ማዔ፣ ያይዳሳ ቦዓሢ ዛሎ ባሽና ዔራኒ ኮዔኔ፤ ዬይ ቦዓሢ ሚርጌና ዒጊቻያ፣ ኬሚ ዴንቁ ባኮዎ ቢያ ዓንጎ ዓጮና ዳይ ማንሢ ማንሢ ሞኦኖ ዓንጎ ፀንጎናኣ ሾኦሊ ሾኦሊ ሙዓያ፤ ዓቴሢ ቶኪና ሃሄርቃያኬ።

20 ጊንሣ ታኣኒ ዬያ ቦዓሢኮ ቶኦካ ዓኣ ታጾ ካኣሮ ዛሎና ጊንፃፓ ኬሰኬ ዳኮ ካኣሮም ዛሎ፤ ሃሣ ዬማ ዳኮ ካኣሮምም ቤዘ ሃሻኒ ቱጊንቴ ሃይሦ ካኣሮ ዛሎዎ ዔራኒ ታ ኮዔኔ። ዬማ ዳኮ ማኣሮማኮ ዓኣፒና ዳንጋና ዓኣያኬ፤ ዒማ ሃንጎዎቶይዳፓ ቢያ ባሽ ዒጊቻያ፣ ያቶርቁ ጌሰታያኬ።

21 «ታኣኒ ዬያ ዛጋ ጎይሣ ዓኣንቴ ዬማ ዳኮ ካኣሮም ያኦሲም ዲማዴዘንሢዳ ያልዚ ቡሊ ዬያቶ ባሽኔ።

22 ዬይ ያዲ ማዔሢ ናንጊና ናንጋሢ ሙኪ ዴኤፖ ያኣዛሢም ዲማዴዘንሢም ፒዜ ዎጌ ዎጋንዳማ ሄሳንዳኣናኬ፤ ዬያታ ያኦሲም ዲማዴዘንሢ ዬያ ካኣቱሞ ዔካ ዎዳ ሄሌ።

23 «ዒዚ ታኣም ዬያኮ ቡሊያ ኬኤዘያ፡- ያይዳሳ ቦዓሢ ሳያይዳ ካኣታዳንዳ ያይዳሳ ካኣቶኬ፤ ዬይ ካኣታሢ ካኣቶ ቢያፓ ባሽ ማዔሢሮ ዓጮ ቢያ ፔ ዴማ ማሢ ዓርቁ ሄርቁ ዎይሣንዳ።

7:13 ማቴ. 24:30፤ 26:64፤ ማር. 13:26፤ 14:62፤ ሉቃ. 21:27፤ ዮሃ. ያፔዳ 1:7፤ 13፤ 14:14። 7:14 ዮሃ. ያፔዳ 11:15። 7:18 ዮሃ. ያፔዳ 22:5። 7:21 ዮሃ. ያፔዳ 13:7። 7:22 ዮሃ. ያፔዳ 20:4።

24 ታጳ ካኣሮንሢ ዬያ ካኣታሢ ጋራፓ ኬሰካንዳ ታጳ ካኣቶኬ፤ ዬካፓ ቤርታኣሮንሢፓ ዲማዴያ፤ ሜሌ ካኣቲ ኬሰኪ ዬንሢ ታጳ ካኣቶንሢፓ ሃይሦንሢ ሎንሣንዳ፤

25 ዬይ ካኣታሢ ጴኤፖ ጾኣዛሢም ዋይዘ ዒዲ ጾቶርቂ ጌሰታንዳ፤ ጴኤፖ ጾኣዛሢም ዲማዴዘንሢ ዒ ሜታሳንዳ፤ ጾኣሲም ዲማዴያ ማዔ ቦንቾ ኬሎንታ ዋጎንታ ላኣማኒ ዒ ገኢገንታንዳ፤ ጾኣሲም ዲማዴዘንሢ ሃይሦ ለዔና ዛላና ዒዛ ቢታንቶ ዲማ ዋርቃንዳ።

26 ዬካፓ ዴዒ ዋጌ ዋጎንዶ ካኣቶ ጾይታ ጌሢንታንዳ፤ ዬያሮ ዬያ ጾቶሮ ካኣታሢኮ ቢታንቶ ዋልቃ ዔውቴም ናንገና ዒ ጋፒ ባይቃንዳ፤

27 ጫሪንጮ ቢያኮ ዲማ ሳጾይዳ ዓኣ ካኣቶኮ ቢታንታ፡ ዋልቆንታ ጴኤፑሞንታ ቢያ ዔውቴ ጴኤፖ ጾኣዛሢም ዲማዴዘንሢ ማንገንታንዳ፤ ዬያታ ካኣታዲ ዋይሦንዳ ቢታንታ ዔያቶኮ ናንገና ዶዲ ናንገንዳ፤ ዓጮይዳ ዓጮይዳ ዋይሦ ዓሳ ቢያ ዒዛም ዓይሢንቲ ማዲ ናንገንዳ፤ ጌዔ።»

28 ዬያ ታኣኒ ዛጌ ባኮኮ ቡሊፃ ስዲና ጋፔ፤ ታኣኒ ዳኣኔኤሌ ዬያ ባኮ ኮሺ ዒገጠፎ፤ ዲቃቲፃፓ ዔቄያና ዓኣፖ ካራ ታኣኮ ቦኣሬ፤ ስዲ ማዔቴያ ቢያ ባኮ ታኣኒ ታ ዒና ዓርቄ።

8

ዳኣኔኤሌም ጾኣሲ ፔጋሲ ዳቄ ዓዴ ማራይና ኮላይና

1 ቢልፃሶኦሪ ካኣታዴንቲ ሃይሦሳ ሌያና ታኣኒ፡ ዳኣኔኤሌ ሃያኮ ቤርታ ዛጌሰካፓ ዲማ ሜሌ ባኣዚ ዛጌ፤

2 ታኣኒ ዔላኣሜ ዓጮይዳ ኮይሎ ኬኤሎ ዲያና ዲርቆና፡ ሱሳ ካታሞይዳ ዓኣያ ጾኣሲ ፔጋሲ ዳቄም ታ ዛጌ፤ ዒማና ታኣኒ ዑላዬ ዋሮ ዓጫ ዔቂ ዓኣ።

3 ዬኖ ዋሮ ዓጫ ላምፖ ጾዶሲ ካኣሪ ዓኣ ፔቲ ዓዴ ማራይ ዔቂ ዓኣ፤ ዬንሢ ላምፖ ካኣሮንሢፓ ፔቲ ካኣራ ገንፃዲ ኬሰኬያ ማዔቴያ ባጎ ካኣሮፓ ባሺ ጾዶያ ማዔ።

4 ዬይ ማራዓሢ ዬያ ካኣሮና ዲዓኒ ገኢገ ዓጮኮ ዓባ ጌላ ባንሢ፡ ኬዶ ዛሎ ባንሢ፡ ዶኣሎ ዛሎ ባንሢ፤ ገንሣ ሃሣ ሊኮ ዛሎ ባንሢ ዴንዳኒ ጋዓያ ታ ዛጌ፤ ዬያ ማራዓሢኮ ቤርታ ዔቃኒና ዬያኮ ዋልቃፓ

7:24 የሃ. ጾፔዳ 17:12። 7:25 የሃ. ጾፔዳ 12:14፤ 13:5-6። 7:27 የሃ. ጾፔዳ 20:4፤ 22:5።

ቶሊ ዓታኒ ዳንዳዔ ቦፖ ፔቴታፖ ጳዲባኣሴ፤ ዬይ ማራዓሢ ኮዔ ባኣዚ ማዲ ማዲ ሃቺሞ ዶዶኔ።

5 ዬያ ታ ዛጌ ባኮ ማላ ጎይሣ ዓኣንቴ ላሞፖ ዓኣፖኮ ባኣካ ጳኤፒ ካኣሪ ኬሴ ፔቴ ኮላይ ዓጮ ቲቂ ቶኪና ሳዓ ሄርቁሞፖ ዓባ ጌላ ባንፃፓ ባራኒ ሙከኔ።

6 ዬይ ዋኣራሢ ሞሮ ዓጮይዳ ዔቂ ዓኣንቴ ታ ዛጌ፣ ላሞፖ ጉራና ዓኣ ማራዓሢ ባንሢ ጳጋና ጉንጊ ሙከኔ።

7 ዒዚ ማራዓሢ ባንሢ ዶጫሢ ታ ዛጌ፤ ዬካፓ ዒ ማራዓሢዳ ጳጋና ዔቂ ዱሞፖ ላሞፖ ካኣሮ ማራዓሢኮ ማንሣኔ፤ ማራዓሢኮ ዓማና ዒዛ ቃዛንዳ ዋልቂ ባይቄ፤ ዬያሮ ዋኣራሢ ዒዛ ሳዓ ዓጊ ቶኪና ሄርቁኔ፤ ዬያ ዋኣራሢፓ ዒዛ ዓውሳኒ ዳንዳዔ ባኣዚ ባኣሴ።

8 ዬይ ዋኣራሢ ዑሣ ዓኣጳ ዶዳያ ማዔኔ፤ ዬይ ዋኣራሢ ፔቶ ዋልቃዲፓፓ ዔቁያና ዒዛኮ ዶዶ ጉራና ማቄኔ፤ ዬካፓ ቤዘይዳ ያይዶ ጳኤፒ ጳኤፒ ካኣሪ ኬሰከኔ፤ ዬይ ፔቴ ፔቴ ካኣራ ያይዶ ዛሎ ባንሢ ቢያ ሺሬያከ፤

9 ዬንሢ ያይዶ ካኣሮንሢፓ ፔቴማይ ማሌ ዳካ ካኣሪ ኬሰከኔ፤ ዬማ ዳኮ ካኣሮማኮ ዋልቃ ዓጮኮ ደኣሎ ዛሎ ባንሢ፣ ዓባ ኬሰካ ዛሎ ባንፃና ኮኸ፣ ዓጮሎ ባንሢያ ዑጊ ዑጊ ዓኣጳ።

10 ሃሣ ጊንሣ ጫሪንጫ ዓኣ ዋልቆና ዓኣ ባኮ ሄላንዳኣናኣ ጳጊ ጌይ ዑጌኔ፤ ዑሣ ዓኣጳ ዶዳያ ማዔኔ፤ ዬያ ጫሪንጫይዳ ዋልቆና ዓኣ ባኮይዳፓ ዛሎ ሳዓ ኬይሲ ዒ ቶኪና ሄርቁኔ።

11 ዬማ ካኣሮማ ጫሪንጫይዳ ዋልቆና ዓኣ ባኮኮ ሱኡጋሢታፖ ማታሴ፤ ቢያ ኬላ ኬላ ዒዛሞ ዒንጎ ባኮዋ ላኣጊ፣ ጌኤኸ ማኣሮሞ ዒኢሴ።

12 ፑርቱሞፓ ዔቁያና ዬያኮ ያሎ ዓሶንታ ቢያ ኬሊ ዒንጎ ባኣኣ ዔውቲ ዬማ ካኣሮማሞ ዒንጊንቴኔ፤ ዒማ ጎኑሞ ዔኪ ሳያይዳ ኬኤሬኔ፤ ዒማ ማዳ ባካ ቢያ ዒማሞ ጊኢጋያ ማዔኔ።

13 ዬካፓ ፔቴ ጌኤሺ ማዔ ያኣሲ ከኢታንቸ ጌሰታንቴ ታ ዋይዜኔ፤ ዒማና ፔቴ ሃሣ ጌኤሺ ከኢታንቸሰኬይ ዬያ ጌሰቴሢ ኮይላ፡- «ዬንሢ ያኣሲ ፔጋሲ ዳቂ ባኮንሢ ማዲንቴ ኩማንዳ ዋዳ ዓይዲዳይ? ባይሲንቶ ዔኪ ሙካ ፑርቶ ባኮንታ ቢያ ዋዳ ዒንጊንታ ዒንጊያ ላኣጊ ፔኤም ማሃ ዒ ዴዓሢ ሞማ ሄላንዳኣናዳይ? ሃሣ ጌኤኸ ማኣሮንታ ጫሪንጫ ዋልቆና ዓኣ ባኮንታ ዒዛሞ ዒንጊንቴሞ ሄርቁንቴ ናንጋንዳሢ ዓይዲ ሄላንዳኣናዳይ?» ጌይ ያኣጮኔ።

8:10 የሃ. ያፕ. 12:4::

14 ዬይ ያኑጢንቴ ኪኢታንቻሢ ማሃዮ፡- «ጉቶና ዒባኖና ዒንጎ ዒንጊዮ ዒንጊንቴዋዮ ዴዓንዳሢ ላምዮ ሺያና ሃይሃ ጃኤታና ኬሊኬ፤ ዩካፓ ዒኢቴ ጌኤዮ ማኣራ ጌኤሽካንዳኔ» ጋዓንቴ ታ ዋይዜኔ።

ያኑሲ ፔጋሲ ዳዌ ባኮ ኪኢታንቻሢ ጌብሬኤሌ ቡሊ ኬኤዜሢ

15 ታኣኒ፣ ዳኣኔኤሌ ዬያ ዛጌ ባኮ ዛሎ ማላ ጎይሢ ዓኣንቴ ታ ዔሪባኣያ ፔቴ ዓሲ ማላ ባኣዚ ሙኪ ታ ቤርታ ዔቄኔ።

16 ዒማና ዑላዬ ዋሮኮ ሱካፓ፡- «ጌብሬኤሌ! ዬያ ዓሢም ያኑሲ ፔጋሲ ዳዌ ባኮ ዛሎ ቡሊ ኬኤዜ!» ጋዓ ዑኡሲ ታ ዋይዜኔ።

17 ዬያሮ ጌብሬኤሌ ሙኪ ታ ኮይላ ዔቃዛ ታኣኒ ዲቃቴ ሳዓ ሎኦሚኔ። ዩካፓ ዒዚ ታ ኮይላ፡- «ዓሲ ናይ ማዔሢዮ! ኔ ዛጌ ባካ ዓጮኮ ጋፒንሢ ዛላ ማዔሢ ኮሺ ዔሬ» ጌዔኔ።

18 ዬያ ዒ ኬኤዛኣና ታኣኮ ዒና ዲጲ ባይቁም ባሊቶና ሳዓ ታ ሎኦሚናኣኮኬ፤ ዒዚ ጋዓንቴ ታኣኮ ዑዮ ፒፂ ሳዓፓ ታኣኒ ታ ቶኮና ዔቃንዳጉዲ ማኣዲ ዔቄሳዮ።

19 «ዬይ ኔ ዛጌ ባካ ዔርዘሢ ዓጮኮ ጋፒንዮ ዛሎ ማዔሢሮ ያኑሲኮ ጎሪንቶ ኬሎና ዋዋይታንዳቴያ ታ ኔኤም ፒዚሲ ኬኤዛንዳኔ።

20 «ላምዮ ካኣሮና ዓኣ ዓዶ ማራዒሢ ሜዶኔና ፓሪሴ ካኣቶና ማላታያኬ፤

21 ኮላዒሢ ጊንሢ ጊሪኬ ዓጮ ካኣቴ ማላታያኬ፤ ዬያጉዲ ሃሣ ላምዮ ዓኣፖኮ ባኣካ ጴኤፖ ጉራኖ ኬሴ ኮላዒሢ ጊሪኬ ዓጮኮ ቤርታኣ ካኣታሢ ማላታያኬ።

22 ቤርታኣ ካኣራሢ ሜቃዛ ቤዛ ኬሰኬ ያይዶ ካኣሮንሢ ዬይ ካኣታሢ ካኣታዲ ዋይሢ ዓጮ ያይዶ ካኣቶ ማዒ ፓቂንታንዳሢ ማላታያኬ፤ ዬይ ፔቴ ፔቴ ካኣታ ቤርታኣ ካኣታሢጉዲ ዶዲ ማዒንዲዋኣሢያ ዔርዘያኬ።

23 «ዬንሢ ካኣቶንሢኮ ካኣቱሞ ዋዳ ጋፓኣና ሜሌ ፑርታ፤ ሃሣ ጌኔ ማዳ ካኣቴ ካኣታዳንዳኔ።

24 ዬይ ካኣታሢ ሚርጌና ዋልቃዳያ ማዓንዳኔ፤ ዬያ ዒ ማዳንዳሢ ፔ ዋልቄናቱዋኣኬ፤ ዒዚ ዛጊም ጊኢጉዋ ጎይሢ ዓሶ ባይዚ ኩርሳንዳኔ፤ ዒ ማዳ ባካ ቢያ ዒዛም ጊኢጋንዳኔ፤ ዒዚ ጴኤፖ ጴኤፖ ሱኡጎንታ ያኑሲም ዲማጴ ዴሮዋ ባይዛንዳኔ።

25 ዒዚ ዑሣ ዓኣጴ ፑርታ ካኣቴ ማዔሢሮ ጌሺሢና ያርጎጮንዳኔ፤ ቢያፓ ዑሣ ዒ ፔና ጴግ ጴጊዳንዳኔ፤ ዔራንዳጉዲ ቤርታዲ ኬኤዙዋዮ ሚርጌ ዓሲ ዒዚ ዋዲ ኩርሳንዳኔ፤ ሃሣ ዒዚ ካኣቶ

ቢያኮ ካኣታሢያ ሶሊ ዛጋንዳኔ፤ ጋዓንቴ ጋፒንፃ ዒ ባይቃንዳኔ፤ ዒ ዛ ባይዛንዳሢ ዓሲቱቆሴ።

26 ጉቶና ዒባኖና ዒንጎ ባኮ ዛሎ ኔ ዛጌ ባካ ጎኔ ባኣዚኬ፤ ጋዓንቴ ዩይ ኔ ዛጌ ባካ ኩማንዳሢ ሶዶሲ ዎዴይዳ ማዔሢሮ ዩያ ሶኦማኣ ኬኤዙዎሶ ኔ ዒና ዓርቄ» ጌዔኔ።

27 ታኣኒ፥ ዳኣኔኤሌ ዒማና ሚርጌና ላቤሢሮ ዑፃ ታኣኮ ሃርጌም ሚርጌ ኬሊ ታ ላሃኔ፤ ዩካፓ ታኣኒ ዔቁ ካኣቲ ታና ማዶም ዓይሢ ባኮ ማዴኔ፤ ዩያ ታ ዛጌ ባኮ ዛሎ ኮሺ ታ ማሊ ሜታዳኔ፤ ዩይ ዓይጎ ባኣዚታቲያ ዔራኒ ታ ዳንዳዒባኣሴ።

9

ዳኣኔኤሌ ፔ ዴር ዛሎ ሸኢቁ ሸኢጲያ

1 ሜዶኔ ዓጪ ሸይንቲ ዓርፃክሲሴ ጎሣሢኮ ናኣዚ ዳኣሪዮሴ ባብሎኔይዳ ካኣታዳኔ።

2 ዒዚ ካኣታዳንቴ ቤርታሳ ሌዎና ታኣኒ፥ ዳኣኔኤሌ ጌኤዦ ማፃኣፖ ዛጌ ዛጌ ጌይቤቃ ሶኦሲ ፔ ማሊያ ኬኤዛ ዔርሚያሴም ኬኤዜ ጎይዎና ዩሩሳላሜ ካታማ ደዒ ሻሃንቴያ ማዒ ዴዓንዳሢ ላንካይታሚ ሌዔታሢ ታ ዔራኔ።

3 ዩያር ታኣኒ ሲዩ ፓቲሌ ማይንቲ፥ ዲቢንሢዳ ዴይ፥ ሙኡዚ ሙውዎሶ ሸኢጲሢሢያ ሶኦሲ ባንሢ ታ ዛጌኔ።

4 ታኣኒ ሶኦሲም ጎሞ ቡኡፂ ቡኡፂ ሂዚ ጌይ ሸኢቁኔ፡-

«ኔና ናሽካዞንሢና ዓይሢያ ኔኤኮ ካፓዞንሢናም ኔኤኒ ጫኣቃ ጫኣቁሞና ናንጊና ናንጋ ናሹሞ ኔኤኮ ኔ ደዲሺ ካፓያ፥ ኔኤኒ ዴኤፒ፤ ሃሣ ዒጊጪሢሢያ ኔና ኮይሳያ ናንጊና ናንጋ ጎዳ ማዔያ ኔኤኒ ሶኦሲኬ።

5 «ኵኡኒ ጋዓንቴ ፑርታ፥ ዎይዚ ዒፃያ ማዒ ጎሜ ማዲ ኔኤም ዳቤኔ፤ ኔ ዎጎና ዓይሢያና ኩንሢያ ቦሂ ኑ ዓፄኔ።

6 ኵኡኮ ካኣቶም፥ ኵና ዎይሣ ዓሶም፥ ኵኡኮ ቤርታኣ ዓዶንሢንታ ኑ ዓጮይዳ ናንጋ ዴርም ቢያ ኔ ሱንዎና ኔ ኪኣቶ ኬኤዜ፥ ኔ ዓይሎም ኑ ዎይዚባኣሴ።

7 ናንጊና ናንጋ ጎዳሢዮ! ኔ ጎኔ ባኣዚ ማዲያኬ፤ ጋዓንቴ ኔኤም ኵኡኒ ጉሙርቁንታያ ማዒባኣሢሮ ኵና ዓጮ ቢያይዳ ኔ ዜርቁም ዑኬ ሃሣ ሃኬ ዓጫ ዴንዲ ዴንዲ ዓኣ ዓይሁዶ ዴራ ዩሩሳላሜይዳ ናንጋዞንሢንታ ጉቤ ዒሰራዔኤሌ ዴራ ሃሢ ኑ ዴኤፒ ዳውሲንቴ ዳውሲንቴ።

8 ኑ ጎዳሢሮ! ኑኡኒ ቢያሢ ኑ ቤርታ ደቢንቴሢሮ ኑናንታ ኑ ካኣቶንታ ኑና ዋይሢ ዓሶንታ ኑኡኮ ቤርታኣ ዓደንሢንታ ኑ ደውሲንቴኔ።

9 ናንጊና ናንጋ ጎዳ ማዔ ኑ ሆኣዛሢሮ! ኑኡኒ ዋዚ ኔኤም ዓይሢንቶ ዓይቴያ ኔኤኒ ሚጠንታያና ዓቶም ጋዓ ሆኦሲከ።

10 ናንጊና ናንጋ ጎዳ ማዔ ኑ ሆኣዛሢሮ! ኔኤኮ ዋጎ ካፒ ዓይሢንታያ ኑ ማዒባኣሴ፤ ኔኤኮ ዓይሎ፥ ኑ ማሊያ ከኤዛ ዓሶ ዛሎና ኑ ኑም ዒንጌ ዓይሢያ ኑ ካፒባኣሴ።

11 ዒሰራዔኤሌ ዓሳ ጉቤ ኔ ዋጎ ካፖ ዒዒ ሄርቄኔ፤ ኔ ጌዔ ባኮ ቢያ ዋይዞ ዒዔኔ፤ ኑኡኒ ኔኤም ዓይሢንቶ ዒዒ ደቢንቴሢሮ ኔ ዓይላሢ ሙሴ ዛሎና ዒንጊንቴ ዋጎ ማፃአፖይዳ ፃኣፒንቴ ጋዳዎ ቢያ ኑ ጊዳ ኔ ዔኪ ዩዔኔ።

12 ኑኡና ኑ ሱኡጎናይዳ ዴኤፒ ሜቶ ኔ ዔኪ ዩዓኒ ከኤዜሢ ቢያ ኑ ጊዳ ኔ ማዲ ኩንሢኔ፤ ዩያሮ ዓጠዳ ቢያ ዓኣ ካታዎፓ ዩሩሳላሜጉዲ ሜታ ሄሌ ካታማ ፔቴታያ ባኣሴ።

13 ሙሴ ዋጎይዳ ፃኣፒንቴ ጎይያ ዩያ ቢያ ሜቶ ኑ ጊዳ ኔ ዔኪ ዩዔኔ፤ ናንጊና ናንጋ ጎዳ ማዔ ኑ ሆኣዛሢሮ! ዩይ ቢያ ማዔቴያ ኑኡኒ ጎሞ ቡኡዒ ማዒ፥ ጎኑሞ ዓይሢ ጎይያ ዓኣዲ ኔ ማኣሪያ ዳንቃኒ ኑ ሸኢቂባኣሴ።

14 ናንጊና ናንጋ ጎዳ ማዔ ኑ ሆኣዛሢሮ! ኔኤኒ ማዲ ባኮና ቢያ ጎኔ ባኣዚ ማዲያከ፤ ኑኡኒ ጋዓንቴ ኔኤም ዓይሢንቴባኣሢሮ ሃያ ቢያ ሜቶ ኑ ጊዳ ኔ ዔኪ ዩዔኔ።

15 «ናንጊና ናንጋ ጎዳ ማዔ ኑ ሆኣዛሢሮ! ኔኤኒ ሃያኮ ቤርታ ኔኤኮ ዴኤፖ ዋልቆና ኔኤኮ ዴሮ ጊብፂ ዓጫፓ ከሲ ሱንፃ ኔኤኮ ሃኖ ሄላጎዳኣና ዔርቲ ዴዓንዳጉዲ ኔ ማሄኔ፤ ኑኡኒ ሃኣዛጌ ጎሜ ዓሲ፤ ሃሢ ደቢንቴ ዓሲ ማዔኔ።

16 ናንጊና ናንጋ ጎዳሢሮ! ኔኤኒ ማዴ ዒሎ ማዴ ዛሎሮ ቢያ ጌይጋፓ ኔኤም ዲማዴ ዲከሎ፥ ዩሩሳላሜፓ ኔኤኮ ደጎንታ ኔኤኒ ዳከ ፑርቶ ባኮንታ ሸኢሻንዳጉዲ ኑ ኔና ሸኢቃኔ፤ ኑ ጎሞና ኑ ዓደንሢ ደቢንቶ ዛሎናሮ ዩሩሳላሜ ካታሞንታ ዴሮንታ ኑኡኮ ዓሺኖ ማዓ ዓጮ ባኣካ ኑ ደውሲንቴኔ።

17 ኑ ሆኣዛሢሮ! ታኣኮ ሸኢሲያንታ ታ ኔ ቤርቶ ዔኪ ሸኢሻ ባኮዎ ዋይዜ፤ ኑ ሱንፃሮ ጌይባካ ኔኤኮ ሻሂንቴ ጌኤኩ ማኣሮም ሚጠንጎቴ ማሊ።

18 ሆኦሲሮ! ሃዳራ ታኣም ዋይዜ፤ ኑኡኮ ሜቶንታ ኔ ሱንፃና ዔኤሊንታ ካታሜሎኮዎ ባይሲንቶ ሂንዳ ዛጌ፤ ኑ ኔና ሸኢቃሢ ኔኤኮ ማኣሪያ ጉሙርቄከ፤ ኑኡኒ ማዴ ኮሺ ማዴ ዓኣኔ ጌይ ዩያ ጉሙርቄቱዋሴ።

19 ናንጊና ናንጋ ጎዳሢዮ! ኑሞ ዋይዜ፤ ያኑሲዮ! ኑሞ ዓቶንጎ ጌዔ፤ ሃዳራ ኑሞ ዋይዜ፤ ኔ ማዶ ፔጋሲ ዳዌ፤ ያኑሲዮ! ኔጊፖ፤ ሃዳ ካታሜሎንታ ኔኤኮ ዳርንታ ኔ ሱንፆና ዔኤሊንታያኑ።»

ኬኤዚንቴ ያኑሲ ማሊያ ፔጋሲ ጌብሬኤሌ ቡሊ ኬኤዜህ

20 ታናንታ ታ ዒጊና ዒሰራዔኤሌ ዓሶንታኮ ጎሞ ታኣኒ ቡኡዒ ቡኡዒ ያኑሲሞ ዲማዳ ዲኮ ዛሎዋ ናንጊና ናንጋ ጎዳ ማዔ ታ ያኑዛሢሞ ኬኤዚ ኬኤዚ ሺኢጲሢህ ታ ዓርቄ።

21 ዬያ ታ ሺኢቃ ጎይህ ዓኣንቴ ቤርታ ታኣሞ ፔጋዲ ጳዳ፣ ከኢታንቻህ ጌብሬኤሌ ታ ባንሢ ዑኩና ባራኒ ሙኬኔ፤ ዬና ዋዳ ያኑሲሞ ዒንጎ ባኮ ዒንጎ ዋዳ ሄሌያ፣ ሳዓ ዒባኔያኑ።

22 ዒዚ ታ ኮይላ፡- «ዳኣኔኤሌ! ታኣኒ ሃይካ ሙኬህህ ዬያ ያኑሲ ኬኤዜ ያኑሲ ማሊያኮ ዓኣሺንቴ ባኮ ኔ ዔራንዳ ዔራቶና ጳቂሥሢና ኔኤሞ ዒንጋኒኬ፤

23 ኔ ሃጊ ሺኢጲያ ዓዓርቃኣና ያኑሲ ኔኤኮ ሺኢጲያ ዋይዜኔ፤ ኔና ዒ ናሽካያ ማዔሢር ኔ ሺኢቄ ባኮ ታ ኔኤሞ ማሂ ኬኤዛኒ ሙኬኔ፤ ዬያር ዓካሪ ታ ኔኤሞ ኬኤዛ ባኮ ኮሺ ዋይዚ ያኑሲ ኬኤዜ ባኮኮ ቡሊያ ዔሬ።

24 «ላንካይ ማይንቴ ላንካይ ቃልሾ ኬሊ ጌይንቴህ፡- ያኑሲ ኔ ዳርንታ ያኑሲሞ ዲማዳ ካታሜሎንታ ጎሜና ፑርታ ባኣዚናፓ ጌኤሻኒ ማሊ ቱኬ ዋይኬ፤ ዬንሢ ዋዳይዳ ዳቢንቴ ዓቶሞ ጌይንታንዳኔ፤ ናንጊና ፒዜ ባኣዚ ጌሰቴንቴ ዋጊንታ ዋጊህ ሙካንዳኔ፤ ያኑሲ ፔጋሲ ዳዌ ባኣዚንታ ያኑሲ ማሊሢንታ ኩማንዳኔ፤ ዒኢቴ ጌኤኮ ማኣራኣ ጊንህ ሻቴንቂ ዓካዳንዳኔ።

25 ዬያ ዒና ዔኪ ማሊ ጳቂህ፤ ዬሩሳላሜ ጊንህ ዓካዳንዳጉዲ ዓይሢንቴማፓ ዓርቃዎ ያኑሲ ዶኦሜ ካኣታህ ሙካንዳያ ሃላንዳኣና ላንካይ ቃልሾ ኬሊ ዓኣዳንዳኔ፤ ዬያጉዲ ሃህ ላሂታሚ ላሞዎ ቃልሾ ኬሊ ሜቶ ዋይ ማዒ ዓኣንቴ ዬያይዳ ዶዲ ዬሩሳላሜ ካታሞኮ ሳዞ ጎይያንታ ዙሎይዳ ዋርዲያኣ ቦኑከንቴ ኮሺንታንዳኔ፤ ዬይ ዋዳ ቢያ ሜቶ ዋይ ማዓንዳኔ።

26 ላሂታሚ ላሞዎ ቃልሾ ኬሊኮ ጊንፃፓ ያኑሲ ዶኦሜ ካኣታህ ፒዜ ጌኤሲ ጌሰቴ ዋጊንቴዋንቴ ዋዳንቴ ባይቃንዳኔ፤ ቤርታ ዓርና ማዒ ሙካ ያሎ ዓሶ ሱኡጋሢና ዒዛ ዓሶና ጌኤኮ ማኣርንታ ካታሜሎንታ ሻሂ ቤሲ ባይዛንዳኔ፤ ጋፒንፃ ባይሲንታ ዲጲጉዲ ዒማና ሙካንዳኔ፤ ባይዛንዳጉዲ ዓይሥህ ዳከንቴሢር ጋፒንህ ሄላንዳኣና ያልዚ ሌሊ ማዓንዳኔ።

27 ዬይ ሱኡጋሢ ቃልሾ ከሊ ጋርካ ሚርጌ ዴሬና ዋላ ዶዲ ሳሌ ሳላዳንዳኔ፤ ዬኖ ቃልሾ ከሎኮ ሄካሢዳ ያኦሲም ሹኪ ሲንገንታ ባኮንታ ሃኣኮ ሲንገግንታ ሲንገሱዋዎ ሲ ዳይሳንዳኔ፤ ዬያ ባኮ ቤዘይዳ ባይሰንታ ዔኪ ሙካ ፑርታ ባኣዚ ማዲንታንዳጉዲ ሲ ማሃንዳኔ። ዬይ ያዲ ማዳንዳሢ ዬያ ባይዘያ ማዔ ሱኡጋሢዳ ዳገንቱ ፑርቶ ባካ ማዲንታንዳያ ሄላንዳኣናኬ» ጌዔ።

10

ዳኣኤሌ ፃግርሴ ዋሮ ዓጫ ያኦሲ ዳዌም ዛጌ ባኮ

1 ፓሪሴ ካኣቲ ቂርሴ ካኣታዳንቱ ሃይሣሳ ሌዎና ቢልፃሶኦሬ ጌይንታ ዳኣኤሌም ሜሌ ባኣዚ ፔጋዲ ጴዳኔ፤ ዬይ ከኤዚንቱ ባካ ጎኔ ባኣዚኬ። ዬይያ ዳኤፒ ያልዚ ዛላኬ፤ ጋዓንቱ ዬይ ከኤዘና ባካ ሚርጌና ዴኤሢ ማዔሢር ቡሊፃ ገንሣ ዲማና ፔጋዲ ሲዛም ጴዳኔ።

2 ሲማና ታኣኒ፣ ዳኣኤሌ ሃይሃ ቃልሾ ከሊ ጉቤ ያዩ ዴዔ።

3 ዓሽኪያ ማዎም ሜሌ ዳይሳዋ ኮሽ ሙኡዚ ታ ሙይባኣሴ፤ ዋይና ዑዠዋ ዑሽኪባኣሴ፤ ዬይ ሃይሃ ቃልሾ ከላ ዴንዲ ጋፓንዳያ ሄላንዳኣና ቶኦኮ ታኣኮ ታ ቲሺና ቲሽኪባኣሴ።

4 ሌዎ ዳይያይዳ ቤርታሳ ዳገናኮ ላማታሚ ያይዳሳ ከሎና ታኣኒ ዴኤፖ ዋራሢ ፃግርሴ ዓጫ ዔቄ።

5 ዬካፓ ታኣኒ ዳግ ጌይ ዛጋንቱ ሻኣዣ ቦኦሬ ማኣዎ ማይንቱያ፣ ከርናይዳ ዋርቄ ቃልሾ ቱኬ ፔቱ ዓሲ ታ ዴንቄ።

6 ዬያ ዓሢኮ ዑፃ ሲንቁ ጌይንታ ሚዛጳ ሹጮጉዲ ፖፖዓያኬ፤ ዓኣፖ ካራኣ ሲዛኮ ዜዜኤሊንሣኔ፤ ዓኣፓ ገንሣ ታሚጉዲ ዔዔኤታያ ማላኔ፤ ሲዛኮ ቶኮና ኩጮና ዑጪ ገኢጊሾና ሞኦና ዳንገጉዲኬ፤ ዑኡዛ ሃሣ ሚርጌ ዓሲ ዑኡሲጉዲ ያዎኣዣያኬ።

7 ዬያ ያኦሲ ፔጋሲ ዳዌ ባኮ ዛጌሢ ታና፣ ዳኣኤሌ ሌሊኬ፤ ታኣና ዋላ ዓኣ ዓሳ ፔቲታዎ ዴንቄ ባኣዚ ባኣሴ፤ ጋዓንቱ ዔያታ ሚርጌና ዲቃቲሢር ጳሽኪ ዴንዲ ፑኔ።

8 ታኣኒ ሲማና ዬያ ዲቃሢ ሄርሺሳያ ማዔ ታኣም ጴዳ ባኮ ዛጌ ታኣር ሌሊ ሲኣካ ዓቲኔ፤ ዋልቃ ታኣኮ ቢያ ጋፔም ታ ላቤኔ፤ ዓኣፖ ካራኣ ታኣኮ ቦኦሬ።

9:27 ዳኣኤ. 11:3፤ 12:11፤ ማቲ. 24:15፤ ማር. 13:14። 10:6 ዮሃ. ያፔዳ 1:13-15፤ 2:18፤ 19:2።

9 ዬያ ዓሣኮ ዑኡዞ ታዋይዛዛ ዒና ታኣኮ ዲቃቲፓፓ ዔቁያና ዲጲ ባይቁም ሳዓ ታኣኒ ሎኦሜኔ፤ ዒኢካ ባሊቶና ሳዓ ሎኦሚ ላሂ ታ ዓቲኔ።

10 ዬካፓ ፔቲ ኩቺ ታኣኮ ዑፆ ካኣሚ ፒዌኔ፤ ታኣኒ ዒማና ጎጋይቁሢ ዳ ዓኣሢሮ ታና ዒዚ ኬኤሊንቁም ኩጮና ሳፆ ዓርቂ ታ ቶኮና ታ ዔቁኔ።

11 ዬይ ያኦሲ ኪኢታጎቻሢ፡- «ዳኣኔኤሌ! ያኦሲ ኔና ዒናፓ ናሽካኔ፤ ሃኣዛጌ ታኣኒ ኔ ኮይላ ዳኪንቲ ሙኩኔ፤ ኔ ዓኣ ቤዛ ፒዝ ጌይ ዔቁ፤ ታ ኔኤም ኬኤዛ ባኮ ዒና ዔኪ ዋይዜ!» ታኣም ጌዔኔ። ዬያ ዒ ታኣም ኬኤዛዛ ታኣኒ ጎጋይቁ ጎጋይቁ ሳፓፓ ዔቁኔ።

12 ዒዚ ዒማና፡- «ዳኣኔኤሌ! ዒጊጨፖ፤ ጳቂሥሢ ዔራቶ ዳንቃኒ ኔ ቶኣኮ ኔ ያኦሲ ቤርታ ሂርኪዲ ላኣፒሳኒ ማሌ፣ ቤርታሳ ኬላፓ ዓርቃፆ ሸኢጲፆ ነኤኮ ዋይዚንቲ፤ ታኣኒያ ዳኪንቲ ኔ ኮይላ ሙኩሢ ኔኤኮ ሸኢጲፆኮ ያኦሲ ማሂ ማሂፆ ዔኪኩ።

13 ፓሪሴ ዓጮ ካኣቶ ሱኡጌ ማዔ ዓያናሢ ላማታሚ ፔቲ ኬሊ ፑቤ ታና ማኪ ሜቶ ቤኤዜኔ፤ ታኣኒ ፓሪሴይዳ ታኣሮ ሌሊ ማዔሢ ዛጊ ያኦሲ ኪኢታጎቻ ሱኡጎፓ ፔቲሢ፡ ሚካዔኤሌ ታና ማኣዳኒ ሙኩኔ።

14 ታኣኒ ሃሢ ሙኩሢ ኔ ዒጊኖይዳ ጋፒንፆ ዋዶና ሄላንዳ ባኮ ኔኤም ፒዚሲ ኬኤዛኒኬ፤ ዬያሮ ሃያ ሌሊቱዋንቲ ሃጊ ማዓንዳ ባኮ ፔጋሲ ዳዋኒ ጴዳንዳ ባኣዚ ሜሌ ዓኣኔ» ጌዔኔ።

15 ዬያ ዒ ታኣም ኬኤዛዛ ታ ጎፆንዶ ጎይሢ ባይዚ ሳፆ ባንሢ ቁኡሉምቢ ዘቲ ጌዔኔ።

16 ዬካፓ ዓሲ ማላ ባካሢ ፔኤኮ ኩጮ ታ ባንሢ ሎይሲ ሙሱሮ ታኣኮ ካኣሜኔ፤ ታኣኒ ዒማና፡- «ጎዳሢዮ! ሃይ ያኦሲ ታኣም ፔጋሲ ዳቂ ባካ ታና ኮሺ ሃርጌሢሮ ዑፆ ታኣኮ ዶጨ ዓቲኔ።

17 ታኣኒ ኔኤም ማዳያ፣ ኔ ዓይሌ ማዓፆ ኔና ታ ጎዳሢና ዋላ ዋይቲ ጌሰታኒ ዳንዳዓይ? ዑኡዞታፆ ዔኪፆ ባሾም ሚርጌና ታ ላቤኔ» ጌዔኔ።

18 ዬይ ዓሲ ማላ ኪኢታጎቻሢ ላሚ ታኣኮ ዑፆ ካኣሚ ፒፃዛ ታኣኒ ደዴኔ።

19 ዒዚ ታኣም፡- «ዔኤዛይ! ያኦሲ ኔና ዒናፓ ናሽካኔ፤ ኔኤም ኮሺ ማዓንዳኔ፤ ዒጊጨፖ፤ ደዴ!» ጌዔኔ። ዒዚ ዬያ ጋዓዛ ታኣኒ ደዳፆ፡- «ጎዳሢዮ! ኔ ታኣም ደዴም ዒንጌሢሮ ሂንዳ ዓካሪ ታኣም ኬኤዜ» ጌዔኔ።

20-21 ዒዚ ሃሢ ጊንሢ፡- «ታ ኔ ኮይላ ዓይጋ ሙኩቲያ ኔኤኒ ዔራ? ታኣኒ ኔ ኮይላ ሙኩሢ ጎኔ ማፃኣፖይዳ ፆኣፒንቲ ባኮ ፔጋሲ ኔኤም

10:13 ዮሃ. ያፔዳ 12:7።

ከኤዛኒኬ፤ ሃጊ ጊንሣ ሃሣ ታኣኒ ሙኪ ፓሪሴ ካኣቶ ሱኡጌ ማዔ ዓያናሢና ሃልታንዳኔ፤ ታኣኒ ዴንዴሰካፓ ጊሪከ ዓጮ ካኣቶኮ ሱኡጌ ማዔ ዓያናሢ ሙካንዳኔ፤ ጋዓንቴ ዒሰራዔኤሌ ካፓ ኪኢታንቻሢ ሚካዔኤሌፓ ዓቴሞ ታና ማኣዳንዳይ ባኣሴ።

11

1 «ሜዶኔ ዓጮ ዓሢ ዳኣሪዮሴ ካኣታዳ ቤርታሳ ሌዖና ታኣኒ ዒዛ ማኣዳኒና ደዲሻኒ ዒዛ ኮይላ ዔቄኔ።

2 ታኣኒ ሃሢ ኔኤሞ ከኤዛ ባካ ጎኔ ባኣዚኬ።»

ጊብፃና ዓሶኦሪ ዓጮና ካኣቶ ዛላ

ዬይ ዓሲ ማላ ኪኢታንቻሢ ሂዚ ጌይ ከኤዚሢ ዓርቄኔ፡- «ሜሌ ሃይሣ ካኣታ ፓሪሴ ዓጮይዳ ካኣታዳንዳኔ፤ ዬያቶፓ ሄሊሲ ካኣታዳንዳይ ያይዳሳ ካኣታሢ ሃንጎሞቶፓ ቢያ ባሽ ዖርጎቹ ማዓንዳኔ፤ ዒዚ ዖርጎቹ ማዓንዳያታሢሮ ዋልቃ ዒዛኮ ደዳዛ ሜሌ ካኣቶ ዘሪ ፔኤና ዋላ ዔኪ ጊሪከ ዓጮ ካኣቲ ዒ ያላንዳኔ።

3 «ዬካፓ ያልዚ ያላ ፔቴ ደዲ ካኣቲ ካኣታዳንዳኔ፤ ዬይ ካኣታዲ ዋይሣንዳ ዓጮ ሚርጌና ዳልጊ ማዓንዳኔ፤ ዒ ኮዔ ባኣዚ ቢያ ማዳንዳኔ።

4 ጋዓንቴ ዋልቃ ዒዛኮ ዑሣ ዓኣዳ ደዲ ደዲ ዓኣዳኣና ዒ ካኣታዲ ዋይሣ ዓጮ ፑርቲ ዓጮኮ ያይደ ዛሎ ባንሢ ቢያ ፓቂንቲ ፓቂንቲ ዴዓንዳኔ፤ ዒዛ ቤዛ ዒዛ ዜርሢ ማዒባኣ ካኣታ ካኣታዳንዳኔ፤ ያዲ ማዔቴያ ዬያ ካኣቶይዳፓ ፔቴ ካኣቲታዖ ዒዛጉዲ ዋልቃዳዓኬ።

5 «ጊብፃ ካኣቲ ደዲ ማዓንዳኔ፤ ጋዓንቴ ዒዛኮ ያሎ ዓሶ ሱኡጎፓ ፔቴ ዒዛፓ ባሽ ደዳያ ማዓንዳኔ፤ ዒ ዋይሣ ዓጮኣ ዴኤፒ ማዓንዳኔ።

6 ዳካ ለዔኮ ጊንፃ ጊብፃ ዓጮ ካኣቲ ሶኦሪያ ዓጮ ካኣቲና ዋላ ሳሌ ጌሊ ዒጊንታንዳኔ፤ ዒዚ ፔኤኮ ዉዴር ናዖ ሶኦሪያ ዓጮ ካኣቲሞ ዒንጋንዳኔ፤ ጋዓንቴ ዒዛ ፔኤኮ ዋልቆ ደዲሻኒ ዳንዳዒንዳዋኣሢሮ ካኣቲኮ ዋልቃ ደደ ዒፃሞ ዔያታ ዋላ ጌሌ ሳላ ደዲ ዴዒንዳዋሰ፤ ዬያሮ ዒዛ ዒዛ ዓሶንታ ፔኤኮ ናኣቶንታ ማዳ ዓሶንታ ዋላ ዋዲንታንዳኔ።

7 ዬካፓ ኔጉዋዖ ዒዛኮ ዒጊኒ ማዔ ፔቴ ዓሲ ዔቄ ካኣታዲ፤ ሶኦሪያ ካኣቲ ያሎ ዓሶና ዋላ ያልታንዳኔ፤ ዔያቶኮ ዋርዲዮዋ ደይሲ ጌሊ ዔያቶ ባሻንዳኔ።

8 ዔያቶ የኦዞኮ ማላሢንታ ዋርቆና ቢሮ ዓንጎና ኮሾና ሜሆንታ ዲዒ ዔኪ ገብፆ ዓጮ ዒ ዓኣዳንዳኔ፤ ዳካ ሌዔይዳ ገብፆ ካኣቲ ሶኦሪያ ካኣቲ ያላኒ ማሊ ዔቃዓኬ።

9 ዩካፓ ገንሣ ሶኦሪያ ካኣቲ ገብፆ ዓጮ ካኣቲ ያላኒ ሙካንዳኔ፤ ጋዓንቴ ዒ ሙኩ ቶኮማና ፔ ዓጮ ገንሣ ማዒ ዓኣዳንዳኔ።

10 «ሶኦሪያ ካኣቲ ዓቲንቆ ናኣቶ ያልዚም ገኢጊሺሢሢሢ ዲቢ ያልዚ ዓሲ ቡኩሳንዳኔ፤ ዩያታ ያሎ ዓሳ ዋልቄና ሳዖ ጉኡዒ ዴንዳ ዲጲጉዲ ሙኪ ዋርዲዮ ሻሂ ጌሊ ያላንዳኔ።

11 ዩማና ዓካሪ ገብፆ ካኣቲ ሚርጌና ዳጋዲ ሶኦሪያ ካኣቲ ያላኒ ዔቃንዳኔ፤ ሶኦሪያ ካኣቲ ያሎም ኬሴ ያሎ ዓሰዋ ዒ ባሻንዳኔ።

12 ዒዚ ሚርጌ ያልዚ ዓሲ ዲዒ ዔካንዳሢሮ ዒና ዒዛኮ ያቶርቃንዳኔ፤ ዩካፓ ሚርጌ ሺያና ፓይዲንታ ዓሲ ዒ ዋዳንዳኔ፤ ያዲ ማዔቴያ ዩያይዲ ዒ ባሻሢሢ ሌሊ ዴዓዓኬ።

13 «ዒማና ሶኦሪያ ካኣቲ ፔ ዓጮ ማዒ ዴንዲ ቤርታኣሰካፓ ባሻ ያልዚ ዓሲ ገኢጊሻንዳኔ፤ ዳካ ሌዔ ዴዓዖ ዩያ ያሎ ዓሶ ኩሙሢ ዓንጋሞ ማይሲ ያሎሮ ገንሣ ሙካንዳኔ።

14 ዩካፓ ሚርጌ ዓሲ ገብፆ ካኣቲም ዋይዞ ዒ ያንዳኔ፤ ዳኣኔኤሌ! ሃያ ኔ ዛጌ ባካ ቢያ ኩማንዳጉዲ ኔ ዒጊኖፓኣ ፔቴ ፔቴ ዓሲ ጉሪ ዛሎ ማዣንዳኔ፤ ጋዓንቴ ዔያቶም ገኢጋዓኬ።

15 ዩያሮ ሶኦሪያ ካኣቲ ዙላ ኬኤሌና ዲርቂንቴ ፔቴ ካታማሰኬኖ ማንጊ ዓርቃንዳኔ፤ ገብፆ ዓጮኮ ያሎ ዓሳ ዩያቶ ቃዛዓኬ፤ ዔያቶ ባኣካፓ ያሎና ዔርቴ ዓሳታዖ ያልቄ ባይቂ ባሻንታንዳኔ።

16 ኬዶ ዛላፓ ዓጮ ያሊ ዓርቃኒ ሙካሢ ኮዔ ባኣዚ ማማዳንዳኔ፤ ዩያ ዔቂ ቃዛንዳይ ባኣሴ፤ ዩይ ሙካሢ ያኦሲም ዲማዔ ጌኤዣ ዓጮሎታዖ ዓይሱዋዖ ጌሊ ዓርቃንዳኔ።

17 «ዒማና ሶኦሪያ ካኣቲ ፔኤኮ ጉቤ ያሎ ዓሶ ቡኩሲ ዔኪ ያሎሮ ማሊ ዔቃንዳኔ፤ ፔኤኮ ሞርኮ ማዔ ካኣቶ ዓጮ ያሊ ባይዛኒ ፔኤኮ ዉዲሮ ናዖ ዒንጊ ፔ ሞርኮ ካኣቶና ዋላ ፔቱም ጌኤሲ ጌሰቴ ገኢጋንዳኔ፤ ያዲ ዒ ማዔቴያ ማሊ ያዒ ሙካም ኩማዓኬ።

18 ዩካፓ ዒ ባዞ ዓጮ ዓኣ ዓጮ ያሊ፣ ዩያ ዓጮፓ ሚርጌ ዓጪ ባሻ ፔ ዴማ ማሂ ዓርቃንዳኔ፤ ጋዓንቴ ፔቴ ያልዚ ዓሲኮ ሱኡጌ ዒዛ ያሊ ባሻንዳሢሮ ዒዛኮ ያቶርሙማ ዒማካ ጋፓንዳኔ፤ ጎኔና ዒ ያቶርቂ ጮኦሽኪንቴ ጌሰቴ ጌኤዛ ቢያ ዒዛይዳ ማዒ ኩማንዳኔ።

19 ዒዚ ዩካፓ ፔ ዓጮ ዒ ዋርዲ ገኢጊሻ ቤዞ ማዒ ዴንዳንዳኔ፤ ዩካ ጎይዖ ዒ ማቶይዳ ኬዳንዳሢሮ ላሚ ዩያይዲ ኬሰኪ ጴዳዓኬ።

20 «ሚሌ ካኣቲ ዒዛ ቤዛ ካኣታዳንዳኔ፤ ዩይ ካኣታሢ ፔ ካኣቱምኮ ቦንቾ ካፒ ዴይሣኒ ፔቴ ገኢራ ገኢራሻንዳ ዓሲ

ደኑራንዳኔ፤ ያዲ ማዕቴያ ዬይ ካኣታሢ ዳካ ዎዴኮ ጊንፃ ዎዲንታንዳኔ፤ ዒ ሃይቃንዳሢ ዴሬ ዒዲ ዒዛይዳ ዔቁሞ፡ ጊንሣ ሃሣ ያልዚናኣቱሞሴ» ጌዔኔ።

ፑርቶ ሶኦሪያ ካኣቲ

21 ዬኖ ታኣሞ ያኦሲ ፔጋሲ ዳዌ ባኬላ ዎዚ ጌይሢታቲያ ቡሊ ኬኤዛ፣ ኪኢታንቻሢ ሂዚ ጌዔኔ፡- «ዒዛ ዬያ ካኣታሢኮ ቤዛ ፔቲ ቦሂንቲ ዓሲ ዔቁ ካኣታዳንዳኔ፤ ጋዓንቲ ካኣቲ ማዒ ቦንቸንቶ ቦንቻ ዒዛሞ ዒንጊንቲባኣሴ፤ ዒ ዬይ ዓሢ ጌኔ ጎይሢና ዔርቲባኣንቲ ካኣቱሞ ቢታንቶ ዔኪ ዴዓንዳኔ።

22 ዬይ ካኣታሢ ቁኤሶ ቢያኮ ዑፃ ማዒ ያኦሲሞ ማዳ ቁኤሳሢያ ዓይሱሞ ዒዛ ቤርታ ሺኢኬ ያሎ ዓሶ ቢያ ዎዲ ፒዲ ባይዛንዳኔ።

23 ማልቲ ዎላ ኮሹሞ ሳሌ ሳላዲ ሜሌ ዓሶ ዒ ጌሻንዳኔ፤ ዒዛ ዓሲ ማዒ ሃንታ ዓሳ ዳካ ማዕቴያ ደዲ ደዲ ዒ ዓኣዳንዳኔ።

24 ፔቲ ሚርጌና ያርጎቹ ማዕ ፓቆና ዓጪ ዔርቲባኣንቲ ሙኪ ዒ ዓርቃንዳኔ፤ ዒዛኮ ቤርታኣ ዓደንሢ፣ ፔቲይታ፣ ማዲባኣ ባኣዚ ቢያ ዒ ማዳንዳኔ፤ ዒ ያሎና ደዒ ዔኬ ባኮንታ ቆሎንታ ቢያ ዒዛ ዓሲ ማዒ ሃንታ ዓሶሞ ዒ ጊሻካንዳኔ፤ ዓሳ ዎርዲ ዎርዲ ዴዔ ቤዛይዳ ያልዚ ቡላኒ ዒ ማሊሢ ጌሣንዳኔ፤ ጋዓንቲ ዬይ ዒዛኮ ዳካ ዎዴር ማዓንዳኔ።

25 «ዬይ ካኣታሢ ዲቢ ያልዚ ዓሲ ቡኩሲ ዔኪ ጫርሹሞና ጊብፄ ዓጮ ካኣቲ ያላኒ ዴንዳንዳኔ፤ ጊብፄ ካኣቲያ ፔ ዛሎና ኮሺ ዲቢ ያልዚ ዓሲ ጊኢጊሺ ዬያ ሙኬ ያሎ ያሊ ቃዛንዳኔ፤ ጋዓንቲ ጊብፄ ካኣቲሞ ማዲንታንዳ ጌኔ ማዶ ዓኣሢር ዒዛሞ ጊኢጋዓኬ።

26 ዒዛና ዎላ ሙዓ፣ ደንዛ ዒዛ ዎዳንዳኔ፤ ዒዛኮ ያሎ ዓሳኣ ጋፓንዳኔ፤ ሚርጌ ዓሲ ያልዚና ሃይቃንዳኔ።

27 ዬካፓ ዬንሢ ላሞ፣ ካኣታ ዒኖይዳ ጌኔ ማሊሢ ዓርቁ ዓርቁ ዓኣ፣ ፔቲይዳ ዎላ ሙኡዚር ዴዓንዳኔ፤ ፔቲይ ባጋሢ ጌሻኒ ሉኡዚ ባኣዚ ዔያታ ዎሊሞ ኪኤዛንዳኔ፤ ጋዓንቲ ጎዖና ዎዳ ሃጊ ሄሊባኣሢር ዬያ ዔያታ ማሌ ጎይያ ዔያቶሞ ማዓንዳ ባኣዚ ባኣሴ።

28 ዒማና ሶኦሪያ ካኣቲ ደዒ ዔኬ ባኮ ቢያ ዔኪ ማዒ ዴንዳንዳኔ፤ ዒና ጋዓንቲ ዒዛኮ ያኦሲ ዓሳ ካኣሽካ ካኣኸ ባይዛኒኬ፤ ዒዚ ኮዔ ባኣዚ ቢያ ማዴሰካፓ ፔ ዓጮ ማዒ ዓኣዳንዳኔ።

29 «ዳካ ዎዴ ዴዓ፣ ጊንሣ ዒ ጊብፄ ካኣቲ ዓጮ ያላኒ ሙኪ ዓርቃንዳኔ፤ ያዲ ማዕቴያ ቤርታኣሲጉዲ ዒዛሞ ጊኢጋዓኬ።

30 ዒማና ሮሚ ዓጮ ዓሳ ዎኣሢ ካኣሚሊና ሙኪ ዒዛ ያላንዳሢር ሚርጌና ዒ ደቃታንዳኔ፤ ዒዚ ባሺንቲ ጊንሢሞ ደጫ፣ ዴኤፒ ዳጋና

የኦሲ ዓሳ ካኣሽካ ካኣዡ ዒኢሳንዳኔ፤ ዬያ ካኣዡ ዒዲ ዲማዲ ዔቁ ዓሶና ዎላ ዒዚ ዒጊንቶዎ ማዡንዳኔ።

31 ዒዘኮ የሎ ዓሳ ጌኤዡ ማኣሮንታ ኮይሎዎ ቢያ ዒኢሳንዳኔ፤ ቢያ ኬሊ የኦሲም ዒንጎ ባካኣ ዒንጊንቱዎ፡ዲ ዒ ላኣጋንዳኔ፤ ሻኣካያ ማዔ ዒኢቱ ባኣዚ ዔኪ ሙኡሲ ዔቁሲ ባይሲንታ ዔኪ ዬዓንዳኔ።

32 ዬይ ካኣታሢ የኦሲ ካኣሽኮ ካኣዡ ቤርታ ሃሼ ዓሶ ቢያ ጌሺ ዒዛ ባንሢ ማሃንዳኔ፤ ኮይሳ ጎይያ ጉዴያና የኦሲ ዔሬ ዓሳ ጋዓንቴ ደዳንዳኔ፤ ካኣቲ ዔያታ ደዲ ማካያ ማዓንዳኔ።

33 ዴር ባኣካ ዓኣ ዔር ዓሳ ዔያታ ዔር ባኮ ዴር ዔር ዔርዘንዳኔ፤ ጋዓንቴ ዔያታ ዳካ ዎዴር ታሚና ሚቹንታንዳኔ፤ ጨንቻ ዓፓሮና ጨታንዳኔ፤ ቆላኣ ዔያቶኮ ቡሪንቴ ዔውቴም ዔያታ ቱኡታንዳኔ።

34 ዬያጉዴ ዴኤያ ሜታ ዔያቶ ሃላኣና ፔቴ ፔቴ ዓሲ ዔያቶም ዳካ ባኣዚ ዒንጊ ማኣዳንዳኔ፤ ሚርጌ ዓሲ ጉሙርቁንቴሢናቴዎንቴ ጉሪ ማሊሲ ማዲሢና ዔያቶና ዎላ ፔቴ ማዓንዳኔ።

35 ዔር ዓሶፓ ፔቴ ፔቴ ዓሳ ዲቁንታንዳኔ፤ ያዲ ማዔቴያ ዔያታ ዬያና ደዲ ኬሰካዎ ደንኪሳ ባኣዚ ባኣ ዓሲ ማዓንዳኔ፤ ዬይ ያዲ ማዒ ዴዓንዳሢ የኦሲ ጌዔ ጋፒንዎ ዎዳ ሃላንዳኣና።

36 «ሶኦያ ካኣቲ ኮዔ ባኣዚ ቢያ ማዳንዳኔ፤ ዒ ፔና የኦዘ ማሃ ካኣሽኮ ባካፓ ቢያ ዴግ ዴጊዳንዳኔ፤ ሜሌ የኦዘ ቢያኮ ዑፃ ማዔ የኦዘሢ ሃያኮ ቤርታ ዎይዘንቴ ቤቁባኣ ጨሺ ዒ ጨሽካንዳኔ፤ ማዲንታንዳጉዲ ጌይንቴ ባካ ቢያ ኩማኒ ኮይሳሢር የኦሲኮ ጎሪንቶ ዎዳ ሃላንዳኣና ዔባ ዒዘም ጊኢጋያ ማዓንዳኔ።

37 ዬይ ካኣታሢ ዒዘኮ ቤርታኣ ዓደንሢ የኦዘ ቦሃ ቶኦቻንዳኔ፤ ላኣላ ናሽካ የኦዘዎ ዒ ቦሃንዳኔ፤ ዒዚ ፔና ቢያፓ ዑፃ ማሃ ፓይዳንዳሢር ካኣሽኮ የኦዘ ቢያ ዒ ቦሃ ሃሻንዳኔ።

38 ዬያቶይዳፓ ቢያ ዎርዲዮ ካፓኔ ጌይንታ ሜሌ የኦዘ ባሽ ማሃ ዒ ቦንቻንዳኔ፤ ዒዘኮ ቤርታኣ ዓደንሢ ካኣሽኪ ቤቁባኣ የኦዘም፡- ቢራ ዓንጌ፤ ዎርቁ፤ ፓልም፤ ሚዘጲ ማዒ ቦንቹንታ ሹቹንታ ሜሌ ሚርጌ ሚኢሼም ሻንቹንታንዳ ባኣዚያ ዔኪ ሺኢሺ ቦንቻያ ማዒ ካኣሽካንዳኔ።

39 ዒዘኮ ዎርዲዮ ካፓንዳጉዲ ሜሌ የኦዘ ካኣሽካ ዓሶ ዒ ፓይዲ ዓይሃንዳኔ፤ ዒዘ ጎኔ ሱኡጌኬ ጌይ ዔካዘንሢም ቢያ ዒዚ ዴኤፒ ቦንቻ ዒንጊ ዴር ዎይሃንዳጉዲ ደኦሪ ጌሃንዳኔ፤ ዒዘም ዔያታ ማዴ ባኮ ዘሎርዎ ዴኔ ማሃ ማሃ ዓጪ ቲቁ ጊሽካንዳኔ።

11:31 ዳኣኔ. 9:27፤ 12:11፤ ማቲ. 24:15፤ ማር. 13:14። 11:36 2ቲሲ. 2:3-4፤ ዮሃ. ዮፔዳ 13:5-6።

40 «ጌይንቴ ዎዳ ሄላዛ ጊብፄ ካኣቲ ዳንዲ ሶኦሪያ ካኣቲ ያላንዳኔ፤ ያዲ ማዔቴያ ሶኦሪያ ካኣቲ፡- ሳርጌሎ ያይቶና፣ ፓራሢና፤ ሃሣ ዎኣፆ ካኣሚሎናኣ ማኣዲንቲ ዶዲ ያሊ ዒዛ ቃዛንዳኔ፤ ጊንሣ ሃሣ ሳፆ ጉኡዒ ዳንዳ ዲጲጉዲ ፒዒ ዓጮ ቢያ ፔ ዳማ ማሂ ዓርቃንዳኔ።

41 ሚዛጴሎ፣ ሃጋኣ ዎዛ ጌሢንቴ ዓጮሎዎ ዒ ባሺ ጌሊ ዓርቃንዳኔ፤ ዬያሮ ሚርጌ ዓጮ ዒዛ ኩጮ ጋሮ ጌላንዳኔ፤ ጋዓንቴ ዔዶኦሚንታ ሞዓኣቤንታ ዓሞኦኔ ዓጮንታ ዬያ ያላፓ ቶሊ ዓታንዳኔ።

42 ሶኦሪያ ካኣቲ ዬያይዲ ሚርጌ ዓጮ ቢታንቶና ዎይሣኣና ጊብፄ ዓጮኣ ዒዛ ኮይላፓ ቶሊ ዓቲንዲዎሴ።

43 ጊብፄ ዓጮኮ ዎርቆንታ ቢሮ ዓንጎንታ ሜሌ ቦንቺንታያ ማዔ ባኮ ቢያ ዓኣቺንቴ ቤዛፓ ኬሲ ዒ ዔካንዳኔ፤ ሊኢቢያ ዓጮንታ ዒቶጲያንታ ቢያ ዒ ያሊ ባሻንዳኔ።

44 ዬካፓ ዓካሪ ዓባ ኬሰካ ዛሎና ኬዶ ዛሎናፓ ሙካንዳ ሃይሴ ዒዛ ዲቃሣንዳኔ፤ ዒዚ ዬያሮ ዴኤፒ ዳጋና ዔቂ ሚርጌ ዓሲ ዎዲ ቤሲ ባይዛንዳኔ።

45 ዴኤፖ ባዘና ጌኤዦ ማኣራ ማዢንቴ ሚዛጴ ጌሚሮናኮ ባኣካ ዓኣ ቤዘይዳ ዴኤፒ ዴኤፒ ካኣቶሮ ማዓያ ዓፒላና ማዦ ማኣሮ ዒ ደቃንዳኔ፤ ዬያ ቢያ ማዴፆ ጋፒንፃ ዒ ፔኤሮ ባይቃንዳኔ፤ ዒዛ ማኣዳንዳ ዓሲያ ባኣሴ።»

12

ጋፒንፆ ዎዶ

1 ዬያ ያኦሲ ታኣም ፔጋሲ ዳዌ ባኮ ቡሊ ኬኤዛ ኪኢታንቻሢ ላሚ ሃሣ ታኣም ሂዚ ጌዔኔ፡- «ኔ ዳሮ ካፓ፣ ዴኤፖ ኪኢታንቻሢ፣ ሚካዔኤሌ ዬሮ ዎዶና ፔጋዲ ጴዳንዳኔ፤ ዓሲ ማዢንቴማፓ ዓርቃፆ ዛጊቤቁባኣ ሜታ ሙካንዳኔ፤ ጋዓንቴ ሱንፃ ያኦሲ ማፃኣፖይዳ ፃኣፒንቲ ዓኣ ኔ ዳራ ሌሊ ዒማና ደቃንዳኔ፤

2 ሃይቂ ዲኡኪንቴም ዓጮ ሙዔ ዓሳ ቢያ ሃይባፓ ዔቃንዳኔ፤ ዬያቶይዳፓ ዛላ ናኣናና ናንጎ ናንጊዳ ጌላዛ፣ ዛላ ጊንሣ ናኣናና ቦርሲንቲና ዳውሲንቲና ናንጎ ቤሲ ዳንዳንዳኔ።

12:1 ማቲ. 24:21፤ ማር. 13:19፤ ዮሃ. ያፔዳ 7:14፤ 12:7። 12:2 ዒሲ. 26:19፤ ማቲ. 25:46፤ ዮሃ. 5:29።

3 ዬኖ ዋደና ጨንጮ ዓሳ ጨሪንጫ ፖዓ ፖፖጉዲ ዓኣፓ ዲካያ ማዒ ፖዓንዳኔ፤ ማርጌ ዓሳ ዔርዚ ፑርቶ ጎይፃፓ ኮዡ ባንሣ ማሄ ዓሳ ቢያ ጨሪንጫ ዓኣ ዡኣጎጉዲ ናኣናና ፖዒ ናንጋንዳኔ።»

4 ዬካፓ ሃሣ ዒ፡- «ዳኣኔኤሌ! ዓጮኮ ጋፒንፆ ዋዳ ሄላንዳኣና ሃያ ማፃአፖ ጉኡፒ፣ ዓሲ ቡሉዋጉዲ ካር ዲርቄ፤ ዬያ ያኣሲ ማሊሣ ማዒ ኬኤዚንቴ ባኮ ኔ ዒና ዓኣቲ ዓርቄ፤ ዬኖ ዋደና ዓሳ ፔቲ ቤዛፓ ሜሌ ቤሲ ጳሽኪ ሃንታንዳኔ፤ ዔኤቢ ዔራኒ ኮይሣንታ ዔራቶንታ ማርጋንዳኔ» ጌዔ።።

5 ዬካፓ ታኣኒ ዋሮ ዓጮይዳ ላምፆ ዓሲ ሶ ሱኮና ሃኒ ሱኮናይዳ ዔቂ ዓኣያ ዴንቄ፤፤

6 ዬያቶፓ ፔቲሣ ሻኣዡ ቦኦሬ ዓፒላ ማይንቴ ዋሮኮ ኬዴና ዔቂ ዓኣ ኪኢታንቻሣ ኮይላ፡- «ሃይ ቢያ ሄርሺሲ ዲቃሣ ባካ ማዲንቴ ኩማንዳኣና ዋማዲ ዋዴ ዔካንዳይ?» ጌይ ያኣጩ።።

7 ቦኦሬ ሻኣዡ ዓፒሎ ማይንቴ ዋሮኮ ኬዶ ዛለና ዔቂ ዓኣ ኪኢታንቻሣ ላምፆ ኩጮ ሌካ ጨሪንጫ ባንሣ ዔቂሳፆ ናንገና ናንጋ ጎዳሣ ሱንፆና ጫኣቂሰካፓ፡- «ሃይሣ ሌዔና ዛለና ዔካንዳኔ፤ ያኣሲ ዴሮይዳ ሄላ ሜታ ጋፓዛ ዬይ ባካ ቢያ ማዲንቴ ኩማንዳኔ» ጌዔ።።

8 ዬይ ኪኢታንቻሣ ኬኤዜ ባኮ ቢያ ታ ዋይዜ፤፤ ጋዓንቴ ዬይ ዒ ጌዔ ባካ ታኣም ዔርቲባኣሴ፤ ዬያሮ ታኣኒ፡- «ታ ጎዳሣኖ! ሃያ ቢያ ባኮኮ ጋፒንፆ ዓይጎ ማዓንዳይ?» ጌይ ያኣጩ።።

9 ዒዚ ታኣም ማሃፆ፡- «ዳኣኔኤሌ! ዓጮኮ ጋፒንፆ ዋዳ ሄላንዳኣና ዬያ ቃኣሎኮ ማሊፆ ዓኣቲንቴ ጌሣንቴም ዴዓንዳሣር ኔኤር ዓኣዴ፤፤

10 ማርጌ ዓሳ ሸርኪንቴ ጌኤሽኪ ኬሰኪ፣ ዔኤቢ ዶንኪሳ ባኣዚ ባኣያ ማዓንዳኔ፤ ፑርቶ ዓሳ ጋዓንቴ ማሊ ጳቂሡዋኣሣር ፑርቲሞይዳ ፑርቲሞ ቃሲ ቃሲ ናንጋንዳኔ፤ ጳቂሣ ዔራኒ ዳንዳዓንዳዘንሣ ጨንጮንሣ ሌሊኩ።።

11 «ቢያ ኬሊ ያኣሲም ዒንጎ ዒንጊፆ ዒንጊንቶ ዓቲም ሻኣካያ ማዔ ፑርቶ ዒኢሳ ባካ ቤዛ ዔቂ ኬላፓ ዓርቃፆ ፔቲ ሺያና ላምፆ ዪኤታና ታዘጲታሚ ኬሊ ዓኣዳንዳኔ።።

12 ፔቲ ሺያና ሃይሃ ዪኤታና ሃይሣታሚ ዶንጎ ኬላ ጋፓንዳያ ሄላንዳኣና ፔኤኮ ጉሙርቂፆ ካፒ ናንጌሣ ዓንጂንቴያኩ።።

13 «ኔኤኒ ዳኣኔኤሌ! ጋፒንፆ ሄላንዳኣና ኔ ጉሙርቂንታ ጉሙርቂንቴፆማና ዶዲ ናንጌ፤ ዬካፓ ኔኤኒ ሃውሻንዳኔ፤ ሃይቢፓ

12:4 ዮሃ. ያፔዳ 22:10። 12:7 ዮሃ. ያፔዳ 10:5፤ 12:14። 12:10 ዮሃ. ያፔዳ 22:11። 12:11 ዳኣኔ. 9:27፤ 11:31፤ ማቲ. 24:15፤ ማር. 13:14።

ኔኤኒ ዔቂ ጋፒንፆ ከሎና ቦንቺ ኔኤም ዒንጎ ባኮ ኔ ዔካንዳኔ»
ጌዔኔ።

ጌሌዥ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929